



সাত সাগরের মাঝি

ফররুখ আহমদ

সা ত সা গ রে র মা ঝি

সা ত সা গ রে র মা ঝি

ফররুখ আহমদ



পুথি-ওয়েজ
কলোম্বাজরে, ঢাকা।

www.pathagar.com

প্রকাশনার ছয় দশক
স্টুডেন্ট ওয়েজ



প্রকাশক
মোহাম্মদ লিয়াকতউল্লাহ
স্টুডেন্ট ওয়েজ
লিয়াকত গাজা
৯ বাংলাবাজার ঢাকা ১১০০
দূরভাষ : [+৮৮] ০২৭১২১ ৫৬৮
ই-মেইল : studentways@hotmail.com
ওয়েব : www.studentways.info

এস. ওয়েজ তৃতীয় মুদ্রণ
একুশে গ্রন্থমেলা ২০১৪
ফাল্গুন ১৪২০ বঙ্গাব্দ
গ্রন্থস্বত্ব : সৈয়দা তৈয়বা খাতুন

প্রচ্ছদ
নাসিম আহমেদ

অঙ্কর বিন্যাস
এস ওয়েজ কম্পিউটার
বাংলাবাজার ঢাকা

মুদ্রণে
মৌমিতা প্রিন্টার্স
প্যারিদাস রোড ঢাকা

অনলাইন পরিবেশক
www.rokomari.com

মূল্য : একশত টাকা

ISBN : 984-406-388-6

(এই বইয়ের কোনো অংশ প্রকাশকের লিখিত অনুমতি ছাড়া পুনর্মুদ্রণ বা অন্য কোনো মাধ্যমে রূপান্তর করা যাবে না। আলোকচিত্র, ফটোকপি ইত্যাদি এই আইনানুগ নিষেধাজ্ঞার আওতায় পড়ে।)

STATH SAGORER MAZI : A Bengali Poems By Furrukh
Ahmad. Published by Mohammad Liaquatullah of Student Ways. 9
Banglabazar, Dhaka-1100. Third Edition : Ekushe Bookfair 2014.
Price : Taka One Hundred only.

বিশ শতকের শ্রেষ্ঠ তামাদ্দনিক রূপকার
দার্শনিক মহাকবি, আল্লামা ইকবালের
অমর স্মৃতির উদ্দেশে—

তোমার নয়নে দীপ্তি সিকান্দার শাহার মতন ।
নতুন পথের মোহে তৃপ্তিহীন তোমার অন্বেষণ
(জিন্দগীর নীল পাত্রে উচ্ছ্বসিত ঘন রক্ত নেশা
অনির্বাণ শিরাজীর) পাড়ি দেয় মরু, মাঠ, বন,
অথই দরিয়া তীর । হে বিজয়ী! তবু অনুক্ষণ
ধ্যান করো কোন্ পথ, কোন রাত্রি অজানা তোমার,
এক নেশা না মিটিতে সাড়া আসে দ্বিতীয় নেশার ;
এক সমুদ্রের শেষে জাগে অন্য সমুদ্র স্বনন!

যেথা ক্ষীয়মান মৃত পাহাড়ের ঘুমন্ত শিখরে
জীবনের ক্ষীণ সত্তা মূর্ছাতুর, অসাড়, নিশ্চল ;
মুহূর্তের পদধ্বনি জাগে না সে সুষুপ্ত পাথরে,
জ্বলে না রাত্রির তীর, নাহি জাগে স্বপ্ন সমুজ্জ্বল
প্রাণবন্ত মাদকতা ; সে নির্জিত তমিস্রা সাগরে
দিনের দুর্জয় ঝড় আনিয়াছ হে স্বর্ণ-ঈগল ।।

১৫/১১/৪৪

কবির অন্যান্য বই :

নৌফেল ও হাতেম

ফররুখ আহমদের গল্প

মাহফিল (হামদ-নাত)

ফররুখ আহমদের শ্রেষ্ঠ কবিতা

ফররুখ আহমদের শিশু-কিশোর সমগ্র

ইকবালের নির্বাচিত কবিতা

সৃষ্টি পত্র

সিন্দবাদ	৯
বা'র দরিয়ায়	১২
দরিয়ায় শেষ রাত্রি	১৬
শাহুরিয়ার	২১
আকাশ-নাবিক	২৩
বন্দরে সঙ্ঘ্যা	২৭
ঝরোকায়	২৮
ডালুক	৩২
এই সব রাত্রি	৩৬
পুরানো মাজারে	৩৭
পাঞ্জেরী	৩৮
স্বর্ণ-ঈগল	৪০
লাশ	৪১
তুফান	৪৪
হে নিশান-বাহী!	৪৫
নিশান	৪৮
নিশান-বরদার	৫২
আউলাদ	৫৫
সাত সাগরের মাঝি	৫৯

সিন্দবাদ

কেটেছে রঙিন মখমল দিন, নতুন সফর আজ,
শুনি আবার নোনা দরিয়ার ডাক,
ভাসে জোরওয়ার মউজের শিরে সফেদ চাঁদির তাজ,
পাহাড়-বুলন্দ ঢেউ ব'য়ে আনে নোনা দরিয়ার ডাক ;

নতুন পানিতে সফর এবার, হে মাঝি সিন্দবাদ!

আহা, সে নিকষ আকীক বিছানো কতদিন পরে ফিরে
ডেকেছে আমাকে নীল আকাশের তীরে,
ডেকেছে আমাকে জিন্দগী আর মওতের মাঝখানে
এবার সফর টানবে আমাকে কোন্ স্রোতে কেবা জানে!

ঘন সন্দল কাফুরের বনে ঘোরে এ দিল বেইশ,
হাতীর দাঁতের সাঁজোয়া প'রেছে শিলাদৃঢ় আব্বলুস,
পিপুল বনের বাঁজালো হাওয়ায় চোখে যেন ঘুম নামে ;
নামে নির্ভীক সিন্ধু ঙ্গল দরিয়ার হাম্মামে ।

কেটেছে রঙিন মখমল দিন ওজুদে চিকনা সরে,
তবু দূরচারী সফরের ঢেউ ভেসে এল বন্দরে,
হাতীর হাওদা ওঠাও মাহত কিংখাব কর শেষ ;
আজ নিতে হবে জংগী সাঁজোয়া মাল্লার নীল বেশ ।
রোশে ফুলে ওঠে কালাপানি যেন সুবিশাল আজ্দাহা,
মউজের মুখে ভাসছে কিশ্তী শ্বেত,
জানি না এবার কোন স্রোতে মোরা হব ফিরে গুম্রাহা
কোথায় খুলবে নওল উষার রশ্মিধারা সফেদ ;
কোথায় জাহাজ হবে ফিরে বানচাল,
তক্তায় ভেসে কাটবে আবার দরিয়ায় কতকাল ;
সে কথা জানিনা, মানিনা সে কথা দরিয়া ডেকেছে নীল!
খুলি জাহাজের হালে উদ্দাম দিগন্ত ঝিলমিল,
জংগী জোয়ান দাঁড় ফেলে করি দরিয়ার পানি চাষ,
আফতাব ঘোরে মাথার উপরে মাহতাব ফেলে দাগ ;
তুফান ঝড়িতে তোলপাড় করে কিশ্তীর পাটাতন ;
মোরা নির্ভীক সমুদ্রস্রোতে দাঁড় ফেলি বারো মাস ।

সুরাত জামাল জওয়ানির ঠোঁটে বেকার নওজোয়ান
ভাবে জীবনের সব মধু লোটে কমজোর ভীৰু প্রাণ,
এ আশ্চর্য আমাদের কাছে! কিশ্তী ভাসায়ে শ্রোতে
আমরা পেয়েছি নিত্য নতুন জীবনের তাজা স্বাণ ।

পাকে পাকে ঘুরে তীরবেগে ছুটে আবর্তে দিশাহারা,
ক্ষুধার ধমকে ঘাস ছিড়ে খেয়ে আকাশে জাগায়ে সাড়া,
জালিমের চোখ আগুনে পোড়ায় গুঁড়িয়ে পাপের মাথা ;
দেখেছি সবুজ দরিয়া জাজিমে স্বপ্ন র'য়েছে পাতা ।

হাজার দ্বীপের বদ রুসমের উপরে লানত হানি'
কিশ্তীর মুখ ফেরায়েছি মোরা টানি'—
বুরাঈর সাথে পেয়েছি ভালাই অফুরাণ জিন্দগী,
আব্লুস-ঘন আঁধারে পেখম খুলেছে রাতের শিখী ।
আর থেকে থেকে দমকা বাতাসে নারিকেল শাখে হাওয়া
ভোলায়েছে সব পেরেশানি, শুরু হ'য়েছে গজল গাওয়া,
সুরাত জামাল জওয়ানির ঠোঁটে কেটেছে স্বপ্ন রাত
ওনেছি নেশার ঘোর কেটে যেতে এসেছে নয়া প্রভাত ।

জড়ো করি লাল, পোখরাজ আর ইয়াকুত ভরা দিন
দরিয়ার বুক নামায়েছি ফের বে-দেরেগ সংগিন,
সমুদ্র-সিনা ফেড়ে ছিটে চলে কিশ্তী, স্বপ্ন সাধ ;
নতুন পানিতে সফর এবার. হে মাঝি সিন্দবাদ!

আজ নির্ভীক মাল্লার দল ছোটে দরিয়ার টানে,
পান করি সিয়া সুতীত্র জ্বালা কলুষিত বিয়াবানে ;
হারামি মওত ঢাকে সারা মন, দেহ,
গলিজ-শহরতলীতে আবার জেগে ওঠে সন্দেহ ;
বিষ নিশ্বাসে জিন্দগী ফের কেঁদে ওঠে বিশ্বাস,
নতুন পানিতে সফর এবার, হে মাঝি সিন্দবাদ ।

কালো আকীকের মত এ নিকষ দরিয়ার বুক ছিড়ে
চলো সন্দল বন-সন্ধানে অজানা দ্বীপের তীরে,
হালের আঘাতে নোনা পানি ছুড়ে রাহা খোঁজো গুমরাহা
পার হয়ে যাও আয়েশী রাতের ফাঁদ ;
পাথর জমানো দরিয়ার তীরে মওতের বুক আহা,

কাফুরের মত নতুন জীবন ডাকছে সিন্দবাদ!
জড়তার রাত শেষ হ'য়ে এল আজ,
কেটেছে পঙ্কা নরম আয়েশ আশ্রতে বহুদিন,
ম'র্চে ধরেছে কবজায় ; স্নান তাজ ।
আজ ফুঁড়ে চলো দরিয়ার সংগিন,
ভাঙে এ নরম মখমলে ছাওয়া দিন ;
মাতমি-লেবাস ফেলে আজ পরো মাল্লার নীল সাজ ।

আমরা মরি না, সুখা মাটী শুধু তাকায় শংকাকুল,
দরিয়ার ডাকে এক লহুমায় ভাঙে আমাদের ভুল,
প্রকাশিত নীল দিন ;
দেখে সফরের প্রসারিত পথ দিগন্ত-স্রোতলীন ।

আনি আলমাস, গওহর লুটে আনি জামরুদ লা'ল,
নিখর পাতাল বালাখানা, থেকে ওঠাই রাঙা প্রবাল,
এরা জিজিরে আটক চিড়িয়া হীন কামনায় বুড়া—
শিরাজী মত্ত! পাথর হানিয়া করি সব মাথা শুঁড়ে ।

রাতে জেড়ে শুনি খোদার আলমে বিচিত্র কল্লোল,
তারা ছিটে পড়ে মধ্য সাগরে জাহাজে জাগায় দোল,
আমরা নাবিক জংগী জোয়ান ইশারা পেয়েছি কত
মউজের মুখে তাই ভেসে যাই টুকরা ঝড়ের মত ।
বজ্র আওয়াজ থামায়ে গভীর দরিয়ায় ওঠে চাঁদ
দিলের দুয়ারে মাথা ঠুকে মরে নাবিক সিন্দবাদ!

ভেঙে ফেলো আজ খাকের মমতা আকাশে উঠেছে চাঁদ,
দরিয়ার বুকো দামাল জোয়ার ভাঙছে বালুর বাঁধ,
ছিড়ে ফেলে আজ আয়েশী রাতের মখমল-অবসাদ,
নতুন পানিতে হাল খুলে দাও, হে মাঝি সিন্দবাদ!

বা 'র দ রি য়া য়

সমুদ্র থেকে সমুদ্রে ঘোরে দরিয়ার শাদা তাজী!
খুরের হল্কা,—ধারালো দাঁড়ের আঘাতে ফুলকি জ্বলে
সমুদ্র থেকে সমুদ্রে ঘোরে দরিয়ার শাদা তাজী...

কেশর ফোলানো পালে লাগে হাওয়া, মাস্তুলে দোলে চাঁদ,
তারার আঙনে পথ বেছে নেয় স্বপ্নেরা সারারাত,
তাজী ছুটে চলে দুরন্ত গতি দুর্বীর উচ্ছল ;
সারারাত ভরি' তোলপাড় করি' দরিয়ার নোনাঙ্গল ।

আদমসুরাত মুছে যায়, জ্বলে গিদন্তে শুকতারা,
জ্বলন্ত খুনে প্রভাতের হাওয়া লাগে,
সুবে সাদিকের স্পন্দন যেন আরো মৃদু হ'য়ে আসে ;
কেশের ফোলানো পাল নুয়ে যায় প্রশান্ত প্রশ্বাসে ।

সিন্ধু ঈগল পাড়ি দেয় পাশে ফেন উত্তাল রাত,
ঝলসায় কালো মেহুরাবে তাজা মুক্ত নীল প্রভাত,
বাজে দ্রুত তালে দৃঢ় মাস্তুলে কারফা হাওয়ার ছড়ে,
ঘোরে উদ্দাম সিন্ধু ঈগল সমুদ্র-নীল ঝড়ে,
তুফানের ছাঁচে ঘূর্ণাবর্তে সুগঠিত তার তনু,
পুষ্ট পালকে পিছলিয়া পড়ে প্রবাল বর্ণধনু,
দুই রঙা স্রোতে কোথা দূরে দূরে ঘুরে ফেরে দিনমান ;
ফিরে আসে মৃত বৃন্তানে ফের নও বাহারের গান ;
দীর্ঘছন্দা নারিকেল শাখে মুক্তি উঠেছে বাজি'
সরন্দিপের তীরে তীরে কোথা পাখিরা ধরেছে গান ;
সিন্ধু ঈগল বালুচরে বুঝি নীড় করে সন্ধান
সমুদ্র থেকে সমুদ্রে ছোটে দরিয়ার শাদা তাজী ।

এবার কোথায় কোন্ বন্দরে মাঝি!
ভিড়বে কিশ্তী মুখ ?
থামবে কোথায় দরিয়ার শাদা তাজী ?

কত স্রোত আর ঘূর্ণি তুফান পাড়ি দিয়ে অবহেলে ;
কত লাল, নীল, জরদ, প্রভাত ; সন্ধ্যা এসেছি ফেলে ;

আমাদের তাজী ফেন উচ্ছল মুখ
থামকে না বুঝি সব স্রোত থেমে গেলে!

তুফানের মাঠ পাড়ি দেওয়া তার একী দুরন্ত নেশা ।
দাঁড়ের আঘাতে জিজিরে তার নীল নেশা ওঠে বাজি'
আমাদের মনে দরিয়ার মস্ততা!
কোথায় উক্ক ছুটেছে মাতাল তাজী ?

দূরে বহুদূরে বন্দর গেছে মিশে
দিগ কাওসের কোলে,
সূর্যের ঝাঁজ জ'মে ওঠে পাল ভ'রে
নতুন পথের বাঁকা ধনু আসে স'রে
সমুদ্র কল্লোলে ;
তীব্র নেশায় দুরন্ত গতিবেগে
বুঝি পথ ভোলে দরিয়ার শাদা তাজী!

দূর বন্দরে দীপ্ত সূর্য, আমাদের গতিমান
জাহাজের পাল স্রোতের নেশায় ভরা,
যেথা দিগন্তে সব্জা হেরেমে ভাসে পরীদের গান,
নেকাব দোলায়ে আদিম বনানী জাগছে নৃত্যপরা ;
দরিয়া-মরুর মরীচিকা পানে মাতাল দুঃসাহসী
ছুটছে অন্ধ তাজী ।

হয়তো সে ভুল, হয়তো সে ভুল নয়
তুফানের মুখে জমা হয় বিষ, জমা হয় সংশয়,
জাহাজের হাল নির্মম হাতে ঘোরাও এবার মাঝি!
এ পথের শেষ, এ গতির শেষ কোথা,
কোথায় মাতাল ছুটছে অন্ধ তাজী ?

জমা হয় কালো টাইফুন মেঘ
পাটাতনে লাগে দোলা,
শংকায় নীল থেমে যায় মুদ্র আবর্ত কল্লোল,
স্বপ্ন শেষের আসন্ন বৈশাখী,
শিকলে শিকলে হেঁষা ওঠে, পালে লাগে টাইফুন দোল
নির্মম হাতে হাল টেনে ধরো মাঝি!

আঁধির পাহাড়, অজগর ঢেউ, শোনো,
শঙ্কিত ঐ সাপের ফণার ত্রাস,
চমকালো ঐ মৃত্যু সর্বনাশ ।
পাল খুলে নাও, যেতে হবে ঝড় ঠেলে
চমকাক্ পাশে কালো আজদাহা লোল জিভ ঘন ঘন...

আল্‌বুর্‌জের চূড়া যেন এক উড়ে আসে কালো দেউ
বজ্রের বেগে পাটাতনে ভাঙে পাহাড়ের মত ঢেউ,
দিনের আকাশে একী জ্বলমাত মাঝি!

ঐ দেখ আসে মউজের পর মউজের কালো সারি ;
ঐ দেখ সাথে নীল আসমানে চমকায় তল্‌ওয়ার,
পাল ফেটে গেল, মাস্তুল ভাঙে বুঝি
ঝড়ের চাবুকে পাটাতনে ওঠে সক্রুণ হাহাকার ;
এই দরিয়ায় ডুবলো বুঝি এবার
আমাদের শাদা তাজী!

পাক বারিতালা আল্লার শান—এই মউজের বুকে
মরদের মত হাল সামলাও মাঝি!

নিপুণ হাতের বলিষ্ঠ পেশী যদি প'ড়ে যায় ছিড়ে
তবে তুরন্ত বদলায়ে নাও হাত,
এক লহ্মার গাফলতে জেনো এই মৃত্যুর তীরে
ডোবাবে অতলে প্রবল ঝঞ্ঝাঘাত ।
বলগা টানো এ ফেনিলাবর্তে
পার হয়ে এই ঝড়
সমুদ্র থেকে সমুদ্র ঘুরে পথ খুঁজে পাবে তাজী!

পাড়ি দিয়ে তুমি এসেছ দরিয়া কতো,
কিশ্তীর মুখ বাঁচায়ে এনেছ বহু টাইফুনে বুঝি ;
ছিড়ে গেছে শিরা, উড়ে গেছে এক হাত ;
আর হাতে তুমি হাল ঘোরায়েছ তুফানের সাথে বুঝি' ।

দরিয়ার মাঝি! তোমার ওজুদে পাথর গলানো খাক!
পাথর পারানো কুঅত তোমারে—দিয়াছে আল্লা পাক!
চলো বেগমার দরিয়ার ঢেউ ছিড়ে,

আল্‌বুর্জের মতো এ মউজ ঘিরে
ঝলসাতে থাক তোমার হালের চাকা,
চম্কাতে থাক তোমার চোখের তারা,
দরিয়া সোঁতায় যেখানে এ তাজী ভেসে চলে দিশাহারা
দাঁড়াও সেখানে ভেঙে চলো এই মউজের কালো পাখা ।

পার হ'য়ে রাত ম্লান জুলমাত ঘেরা
পারে নিয়ে যাবে ভাসমান এই ডেরা
দরিয়ার শাদা তাজী!
সরন্দিপের ঘাটে নোঙ্গর ফেল্বে আবার মাঝি ।

তোমার সঙ্গে দরিয়া তুফানে পরিচয় সুনিবিড় ।
লাখো মউজের জুলমাত ঘেরা কালো সামিয়ানা টুটি,
কূলে নিয়ে গেছে তোমার জোরালো মুঠি ;
সফেদ আলোয় দেখেছি আমরা সরন্দিপের তীর ।

এবার যদি এ তাজী হয় বানচাল
তক্তায় ভেসে পাড়ি দেব কালাপানি,
হাজ্জার জীবন হয় যদি পয়মাল
মানবনা পরাজয়!
ধরো অচপল আবার হালের মুঠি ;
শেষ চেউয়ে আর ক'রব না সংশয় ।

দরিয়া তুফান জয় ক'রে মোরা দাঁড়ায়েছি দেখ মাঝি ।
ভেসো গেছে শুধু মাল্লা সাতশো, আর
উড়ে গেছে শুধু সামনের এক পাটাতন তক্তার,
দেখ ক্ষত তনু সুদৃঢ় মাস্তুল
প্রশান্ত খা'বে মাপে দরিয়ার মুক্ত নীল কিনার,
দেখ আসমানে ফোটে সেতারার কলি,
আরশির মতো নিটোল পানিতে মুখ দেখে বকাওলি ।
এসেছি এখন তুফান বিজয়ী খিজিরের এলাকায়
এবারের ঝড় পাড়ি দিয়ে মোরা ফিরেছি বিজয়ী মাঝি!
দেখ আমাদের নিশান উড়ছে নীল আকাশের গায়
কেশর ফোলানো পাল নিয়ে ফের ছুট্ছে সফেদ তাজী ।

দ রি য় ষ শে ষ রা ত্রি

রাত্রে ঝড় উঠিয়াছিল ; সুবেসাদিকের ম্লান রোশ্নিতে সমুদ্রের
বুক এখন শান্ত । কয়েকজন বিমর্ষ মাল্লা সিদ্দবাদকে
ঘিরিয়া জাহাজের পাটাতনে আসিয়া দাঁড়াইল ।

১ম মাল্লা

কাল রাত জেগে আওয়াজ পেয়েছ' কোনো ?
জিঞ্জির আর দাঁড় উঠেছিল দুলে!

২য় মাল্লা

বুঝি সী-মোরগ সাথীহারা তার দরিয়ার শেষ রাতে
ঝড় বুকে পুরে বসেছিল মাতুলে!

৩য় মাল্লা

যেন সুলেমান নবীর শিকলে বন্দী বিশাল জিন
ছাতি চাপড়িয়ে কেঁদেছিল কাল সারারাত...সারারাত,
পাল মুড়ি দিয়ে পাটাতনে শুয়ে শুনেছি কান্না সেই
সমস্ত গায় লেগেছিল তার হতাশার কশাঘাত,
বন্দী সে জিন কেঁদেছিল বুঝি দূর ও'তানের তরে
কাল রাতে তার আওয়াজ শুনেছি দরিয়ার হাহাঙ্করে ;
সেই সাথে সাথে আমার মনেও জেগেছিল আহাজারি,
ছুটেছিল যেথা জিন্দগী মোর বাগদাদ বন্দরে ।

৪র্থ মাল্লা

দজলার পাশে খিমার দুয়ারে হাসিন জওয়ানি নিয়ে
যেখানে আমার জীবনের খা'ব মন ছুটেছিল সেথা,
কাফেলার বাঁশী ব'য়ে এনেছিল জহরের মত ব্যথা!
কলিজার সেই রুদ্ধ বেদনা শুনেছি ঝড়ের স্বরে ।

৫ম মাল্লা

বুক চেপে ধ'রে কাল সেই ঝড়ে পাটাতনে পেতে কান
শুনেছি সুদূর আজির শাখে টাঙানো দোলার গান,
দুধের বাচ্চা কেঁদে উঠেছিল আমার বৃকের 'পরে,
শুনেছি আমি সে-শিশুর কান্না কাল রাত্রির ঝড়ে ।

সাত সফরের সাথী তুমি জান পাথরে গড়া এ মুঠি,
বেদনা-নিসাড় দোলনার সুরে প'ড়েছিল পাশে লুটি'
বেহঁশ হালতে খুঁজেছি আঁধারে দুখানা কোমল ডানা
কিশ্তীর মুখ ঘোরাও এবার শনব না আর মানা ।

সিন্দবাদ

শনতে কি পাও দূর ও'তানের টান ?
মাঝি মাল্লার দল!
দরিয়ার বুকে শেষ হ'ল সন্ধান ?
ডাকছে থাকের গভীরে স্নেহ অটল ?

৬ষ্ঠ মাল্লা

কাল মাস্তুলে ঝড়ের কান্না শুনেছি একলা জেগে,
শুনেছি কান্না রাত জেগে দূর মরুভূর কূলে কূলে,
বাদামের খোসা এসেছিল এক ভেসে তুফানের বেগে,
আমার বুকের সকল পর্দা উঠেছিল দুলে দুলে,
এসেছিল এক সী-মোরগ তার চঞ্চুতে মাটি ব'য়ে
আমার আতশী রগের রক্ত গ'লেছিল আঁসু হ'য়ে—
দুলে উঠেছিল আবছা আলোয় দরিয়ার নোনা পানি,
নাড়ী-ছেঁড়া ব্যথা মউজের মুখে জেগেছিল কাতরানি ;
শুনেছি আমার পুরানো মাটির টান—
তারার চেরাগে ক'রেছি আমার দিগন্ত সন্ধান ।

৭ম মাল্লা

ডাকে বাগদাদী খেজুর শাখায় শুক্রা রাতের চাঁদ ;
মাহুগির বুঝি দজলার বুকে ফেলে জ্যোছনার জাল,
কোমল কুয়াশা স্নেহে যেথা মাটি পেতেছে নতুন ফাঁদ ;
ঘরে ফেরবার সময় হ'য়েছে আজ ।

সিন্দবাদ

নতুন দ্বীপের পত্তনি নিয়ে পেতেছি সেখানে খিমা,
জরিপ করেছি সাত সাগরের সীমা ;
ঝড়ের ঝাপটা কাটায় এসেছি পাড়ি দিয়ে টাইফুন,
রুহা দ্বীপে নেমে শুকায়েছি মোরা আহত গায়ের ঘুণ...;
পার হয়ে কত এসেছি নিরালা দরিয়ার বিভীষিকা
মাস্তুলে ফিরে জ্বালায়েছি দেখ নয়া সফরের শিখা...

১ম মাস্তা

আজ বাগদাদ ডাকে কোথা বহু দূরে!
যাব স্রোত ফুঁড়ে যাব সব বাঁক ঘুরে
হাতীর হাড়ের সওদা নিয়েছি, নিয়েছি কাবাব-চিনি,
আল্‌মাস আর গওহর দিয়ে বেসাতি করেছি পূরা,
শেষ ক'রেছি এ পিপুল, মরিচ, এলাচের বিকি-কিনি ;
কিশতার মুখ ঘোরাও এবার দরিয়ার বন্ধুরা ।

সিন্দবাদ

ভীৰু কমজোর...

২য় মাস্তা

ভয় পাই নাকো, কমজোর নই মোরা ।
হালের মুঠির মত আমাদের কজা, সিন্দবাদ!
দরিয়ার মত দারাজ সিনায় আজ নামে পেরেশানি ;
এড়াতে পারি না—ঐ শোনো ডাকে বহুদূরে বাগদাদ...

৩য় মাস্তা

মোরা মুসলিম দরিয়ার মাঝি মওতের নাই ভয়,
খিজিরের সাথে পেয়েছি আমরা দরিয়ার বাদশাই,
খাকে গড়া এই ওজুদের মাঝে নিত্য জাগায় সাড়া
বাগদাদী মাটা ; কিশ্তীর মুখ এবার ঘোরাও ভাই!

সিন্দবাদ

কাল ঝোড়ো রাতে দাঁড়ের আঘাতে দামী জেওরের মত
হীরা জওহর ফুটেছিল কত দরিয়ার নীল ছাঁচে,
সফরের মায়া টানছে আমাকে দূর হ'তে আরো দূরে—
নোনা দরিয়ার আকাশ আমার জাগছে বকের কাছে ;
আল্লার এই অশেষ আলমে অফুরান রূপ, রস
জমে গাঢ় হ'য়ে দূর সফরের আশা যেন হীরাবন্ধ—

৪র্থ মাস্তা

দরিয়া-সোঁতায় বুঝে হ'ল কত জিন্দগী পয়মাল,
লোক্‌সান হ'ল হাজারো সে জান মাল,
পেরেশান তনু...

সিন্দবাদ

তবুও শান্তিশেষে

বাগদাদ ফের নতুন সফর দেখবে আগামী কাল ।

আহা ভুলে গেলে আকীকে গড়া এ দরিয়া নীল মহল,
নামে জিল্কদ রাতের শা'জাদী তের তবকের চাঁদ,
ভুলে গেলে তার সকল স্বপ্ন সাধ,
ভুলে গেলে তার সুদূর আশা সফল!

জাজিমের বুকে ছড়ানো পাথর দানা!

ডাকছে আবার তোমাদের সাথে মাল্লা সিন্দবাদ,
চলো ফুঁড়ে চলি আকাশের শামিয়ানা ;

কালো মওতের মুখোমুখি হ'য়ে জংগী জোয়ান ফিরে
দরিয়া-সোঁতায় টেনে তুলি চলো তুফানের মাতামাতি ।
ভুলে যেওনা এ মাল্লার জিন্দগী,
গুরু করো ফের নতুন সফর আজি,
দেখ, মাস্তুলে জ্বলেছি নতুন বাতি ;
মৌসুমী-হাওয়া পাল ভ'রে ওঠে বাজি' ।

৫ম মাল্লা

শুধু দু'ঘড়ির বিশ্রাম নেব পাতার খিমায় মোর,
ক'রব না হেলা মাটির গভীর টান ।
আজ কত দূরে কোথায় সে বন্দর ?
কোথায় আমার খেজুর-বীথির গান ?

৬ষ্ঠ মাল্লা

বা'র দরিয়ায় পেয়েছি আমরা জীবনের তাজছাণ—
পেয়েছি আমরা কিশ্তী-ভরানো জায়ফল, সন্দল ;
দরিয়ার ঝড়ে আহত ক্ষণিক নিতে চাই বিশ্রাম ;
মাটির মমতা বোঝে শুধু এক দরিয়ার মাঝিদল ।

৭ম মাল্লা

ভাঙে দরিয়ার ঘূর্ণী তুফানে জীর্ণ প্রাচীন মন,
সবুজ ঘাসের শিয়রে বাতাস ব'য়ে যায় অনুখন

ভাঙে না, নিত্য গড়ে নেয় মন নতুন মাটির ঘর—
কিশ্তীর মুখ খুঁজে ফেরে তার আশ্রয় বন্দর—

৮ম মাল্লা

হাজার আঘাত গায়ে টেনে তাই বেসামি ক'রেছি পূরা।

সিন্দবাদ

কিশ্তীর মুখ ঘোরাও এবার দরিয়ার বন্ধুরা।
(মাল্লার দল তুমুল কলরবে হালের দিকে ছুটিয়া গেল)

মাল্লাগণ সমন্বয়ে

কিশ্তীর মুখ ঘোরাও এবার দরিয়ার বন্ধুরা...

শা হ্ রি য়া র

শাহেরজাদীর বরোকা'য় এসে সাইমুম স্নায়ু শান্ত শিখিল,
খোঁজে ওয়েসিস মরু-সাহারার চিড় খাওয়া দিল শূন্য নিখিল ।

এ মৃত উষর বালুতে আবার জাগাবে আনার দানা ;
কালো কামনার লাগাম ধ'রবে টানি ?
উচ্ছ্বল রাতের ভুলের আজ বুঝি শেষ নাই,
ভুলের মাটিতে ফুটবে না ফুল জানি ।

হাজার নাজুক কুমারীর মুখ ভাসায়ে লোহর স্রোতে
ছুটেছিল সিয়া জিন্দগী নিয়ে যে পশু মৃত্যুপারে,
হাজার ইশারা ডেকে ডেকে গেছে তারে
থামেনি তবু সে অন্ধ ছুটেছে পথ হ'তে ভুল পথে...

মনে পড়ে সেই নওল উষর হাসিন পিয়ারা দিল
গ্লানি-কলঙ্কে মুছে গেছে হয় আমার সারা নিখিল,
সারা মনে ভাসে রক্তের লাল ছোপ,
সারা গায় জাগে কনুষিত বদফাল
জাগে জঘন্য লালসার কালো পাপ,
শাহুরিয়ারের নীল আকাশের সিতারা করে বিলাপ...
শিরায় আমার জাগেনাকো আর জোছনা-শারাব ধাঁরা
আগুনের মত জ্বলে বুকে ইনসাফ,
সাত আলিশান চাঁদোয়ার নীচে যেন এ গোর আজাব
জড়োয়া জড়ানো কিংখাবে জাগে এ মন সর্বহারা,
খুঁজে ফেরে শুধু দিলের দোসর তার ;
চিড় খেয়ে বুকে জেগে ওঠে শুধু সাথীহারা হাহাকার ।

হাজার রাতের কাহিনী তোমার
হাজার রাতের গান,
ধরে মাহতাব সে রঙিন খাব
জাড়ে সুর-সন্ধান ।

সেতারের তারে যে শূন্য ব্যর্থতা
মান পেরেশান শূন্য শিখান শুনে যাই কথা ।

মনে পড়ে শুধু অসংখ্য বদকার,
কোন কুহকিনী আগস্তরী স্মৃতি,
ঢেকেছে আমার মুক্ত নীল কিনার,
জিন্দগী মোর হ'ল আজ শোকগীতি ।
পিয়াসী এ মন সুদূর সওদাগর
নয়া জৌলুসে হারানো ভিটাতে বাঁধিতে চায় সে ঘর!

চাঁদির তখতে চাঁদ ডুবে যায়
পাহাড় পেতেছে জানু,
নতুন আকাশে জীবনের সুর
জাগাও হাসিন বানু ।

অথচ জানি এ জিন্দগী ঘোরে যেন এক পরোয়ানা
বাঁকা শড়কের পথে মেলে ফের কমজোর লোভী ডানা,
তুফানের মাঝে হ'তে চায় বানচাল
জানে সে কোথায় সূর্য তবুও টানে সে আঁধি আড়াল,
ফিরে ফিরে চায় ডুবতে অন্ধ পাঁকে
ঢেলে যেতে চায় জহরের জ্বালা জীবনের প্রতি বাঁকে ।

ছুটেছে সে আজ অন্ধের বেগে পাহাড় যেখানে ঢালু,
স্নান সাহায়ায় প'ড়ে আছে হায় মুর্দার মত বালু,
যে বিরাণ মাঠে ফোটেনা আনার দানা,
সেই নিরঙ্ক মাঠে এ অন্ধ মন ছোটে একটানা,
উস্কা-আহত পথে পথে ফেরে কাঁদি' ।

জ্বলমাত-স্নান ডেরায় চেরাগ জ্বালাও শাহেরজাদী!
আমার মাটিতে ছড়াও আনার দানা,
হে উজীর-জাদী! আজ তুমি আর গুনোনা কারুর মানা,
হাজার নজুক কমনীয় মুখ যেখানে ভাসছে, আর
আতশী দহনে খুনের তুফানে জ্বলছে শাহরিয়ার ।

আ কা শ-না বি ক

আখরোট বনে,
বাদাম, খুবানি বনে
কেটেছে তোমার দিন।
হে পাখী শ্রব্রতনু,
সফেদ পলকে চমকে বিজুরী, চমকে বর্ণধনু,
সোনালি, রূপালি, রক্তিম রংগিন।

হালকা রেখায় আকাশ ফেলেছে চিরে,
পার হ'য়ে গেছ কত আলোকের স্তর,
রৌদ্রে, শিশিরে নোনা দরিয়ার নীরে,
ফিরেছো কখনো আকাশের তীরে তীরে ;
হে বিহঙ্গ! জানতে না ভয়, কখনো পাওনি ডর।

ইরাণ বাগের বেদানা ওড়িয়ে এনেছো পক্ষপুটে,
স্বপ্ন দেখেছে দূর আকাশের সেতারা তোমার সুরে,
সহসা-প্রকাশ আনারকলির পাপড়ি উঠেছে ফুটে,
লাজ-রক্তিম আনন্দ তার সকল বন্ধ টুটে,
দূর দিগন্ত পাড়ী দিয়ে তারে জাগাও তোমার সুরে ;
আখরোট বনে
বাদাম, খুবানি বনে।

পাকা খরমুজা ফেটে পড়ে কত
মিঠে শরবত বৃকে,
তার চেয়ে মিঠে মিছরিও মানে হার,
তোমার তুতীর কণ্ঠ শিরীণ! নাগিস আঁখি তার
আনারকলির পাপড়ি নিয়ে সে খুঁজে ফেরে বন্ধুকে।
দিন রাত্রির মৌসুম তার ফুলের জোয়ারে ভরা
তোমার পাখায় শিরীণ তোমার হয়েছে স্বয়ম্বর।
স্বপ্ন-মেদুর কেটেছে অহর্নিশ।
আকুল আবেগে আঁখি মেলে নাগিস;
আখরোট বনে
বাদাম, খুবানি বনে।

মেহেদির শাখে থোকা থোকা ফোটে ফুল,
পাতার আড়ালে জাগে দ্বাদশীর চাঁদ,
কোন্ নির্জন গোলাব শাখায় অশান্ত বুলবুল,
সুরের বন্যা, জোছনা ভাসায় জোয়ারে রাতের বাঁধ ;
মধুঘন রাত, স্বপ্ন চোয়ানে শান্ত মুগ্ধ রাত,
গভীর আবেগে তোমার দু'চোখে শিশির-অশ্রুপাত,
ঘুমায় শ্রান্ত তৃতী,
ঘুমায় শ্রান্ত নাগিস আঁখি জাগছে কেবল যুথী ;
আখরোট বনে
বাদাম, খুবানি বনে ।

তোমার সকাল ব'য়েছে পূবালি আকাশে রক্ত খালি
মেহেদীর রঙে, জাফরাণ রঙে অপূর্ব শ্রুততা,
ঘুম-ভাঙা চোখে কলকণ্ঠির কত কথা ব্যাকুলতা,
রসে ফেটে পড়ে আনারকলির সুসম্পূর্ণ ডালি !
শুরু হয় ফের দিগন্ত অভিযান
শুরু হয় ফের নতুন প্রভাতী গান,
নিখর বিমানে, দূর সমুদ্র পানে
আকাশ-নাবিক জাগাও জোয়ার টান ।

কবে তুমি হয় প'ড়েছ ধূলির পরে
জানি নাই, আজ দেখছি বাতাস ব'য়ে যায় হাহা-স্বরে ।
বৃথা খোসা-ভাঙা বাদাম পাথরে পড়ে,
রসাল খুবানি মাটিতে পড়েছে ঝ'রে
তুমি শুধু নাই পাখী,
প'ড়ে আছো কোন্ নোনা পানি ঘেরা অশ্রুর বন্দরে,
বাদামের খোসা ছড়ায় ধূলির পরে
তুমি শুধু নাই পাখী ।

অকাল মৃত্যু ঝরোকোর কাছে এসে
হে পাখী! তোমার উঠছে আর্তস্বর,
তুমি দেখ কোন ক্ষুধিত ভয়ঙ্কর
হিংস্র চোখের দৃষ্টি-তীক্ষ্ণ শর
নিরাশা ধূসর কালো পটে ভাসে মৃত্যুর বন্দর ।
কোথায় একলা ফির্ছে তোমার তৃতী,
সাপের ফণার কাছে এসে তার নিভে যায় অনুভূতি ।

পারোনা উড়তে! সেতারা কি ক্ষীয়মাণ ?
চাঁদের ভাটার ঝড়-তরঙ্গে যুঝে সে হ'য়েছে ম্লান ?
আজ কি তোমার পথে ও পাথারে আজদাহা মাথা নাড়ে ?
আজ কি তোমার বুকের পাঁজরে দারুণ যক্ষ্মা বাড়ে
অনেক আগেই খেমেছে তোমার পথ চ'লবার গান,
সূর্য হয়েছে ম্লান,
শিরীণ কঠ ভুলেছে তোমার ভূতী,
চাঁদের কাহিনী ভুলেছে তোমার জোছনা রাতের দূতী ।

এখানে শোনো না গোধূলি শান্ত শীষ
পেয়েছো শান্ত দিনশেষে শুধু কালো রাত্রির বিষ
হালকা পালক ওড়েনা তুফানে ঝড়ে,
ক্রমাগত শুধু নুয়ে পড়ে ভেঙ্গে পড়ে,
হায় নীড়হারা ক্ষুধা মল্লভরে
সকল দুয়ার রুদ্ধ কোথায় ঠাই তার, ঠাই তার
এ অচেনা বন্দরে ?
ফেরে না তো পাখী তার পরিচিত ঘরে
আখরোট বনে
বাদাম, খুবানি বনে ।

সে কি ভুলে গেছে ঝড়ের আঘাতে তার পরিচিত ঘর!
তুফানে সে পাখী মেনেছে কী পরাজয় ?
বুক-চেরা স্বর ভাসছে বাতাসে তৃতীর আর্তস্বর,
আজ কি জীবনে ঘনিয়েছে পরাজয় ?
হে বিহঙ্গ! তুমি তো জীবনে কখনো পাওনি ডর,
কখনো তো তুমি মানো নাই পরাজয়!
সাত আকাশের সফেদ মুক্তি! কালো রাত্রির ফণা
গ্রাস করল কি তুমি ছিলে যবে সুপ্ত অন্যমনা ?
তবু জানি তুমি এ অপমৃত্যু ছাড়ায়ে উঠতে পারো!
তবে কেন আছো প'ড়ে ?
হে বিহঙ্গ এই জিজ্ঞাসে প্রবল আঘান হানো,
সাত আকাশের বিয়াবানে ফের উদার মুক্তি আনো ;
এখানে থেক না প'ড়ে ।

কথা ছিল তুমি, হে পাখী! কখনো মানবে না পরাজয়,
তোমার গানের মুক্ত নিশান উড়েছে আকাশময়,
দূর আকাশের তারারা দেখছে তোমার এ পরাজয় ;

তোমার পতন দেখে আজ পাখী সবে মানে বিস্ময়!

হে বিহঙ্গ! এ শুধু শ্রান্তি বুঝতে পারোনা তুমি,
ক্ষণ-বিস্মৃতি জাগায় সামনে বালিয়াড়ি মরুভূমি
দেখছো কেবল তৃষ্ণায় ভরা কালো রাত্রির বিষ—
সূর্যোদয়ের পথে দেখে নাই মিঠে পানি ; ওয়েসিস।
ডুবে গেছে চাঁদ ? আঁধারে যায় না দেখা ?
হে পাখী! এখানেো নেভেনি তোমার তারার শুভ রেখা,
তোমার শিরীণ ভোলেনি তো তার গান,
তোমার জোছনা হয়নি তো আজো ম্লান
আখরোট বনে
বাদাম, খুবানি বনে ।

আজকে আবার সেখানে ফিরতে হবে ।
পার হয়ে এই যক্ষ্মাবসাদ শ্রান্ত ব্যাধিতে ঘেরা,
পার হয়ে এই বজ্র নিপাত আকাশের বুক-চেরা
দিতে হবে ফের আঁধারের বুক চাষ,
ভরাতে আনারকলিতে বন্ধ্যা মরুভূর অবকাশ।
আনতে নতুন বীজ যেতে হবে ফারাণের অভিযানে,
ভরাতে মাটির রক্ষতা সেই প্রবল জোয়ার টানে ।

যদিও সূর্য বন্দী এখন আঁধারের ঝরোকাতে
পূব দিগন্তে জেগেছে আলোর গান :
সাত আকাশের যৌবন অম্লান ।

তবে সুর ভালো নীল জোয়ারের আলোকিত ঝর্ণাতে ।

হে পাখী তোমার এ জড়তা ঘুচে যাক,
তোমার শীর্ণ ক্লিন্ততা মুছে যাক
কালো রাত্রির সাথে—ক্ষীয়মাণ ঝরোকাতে ।

আবার আতশী গান,
আবার জাপক দিগন্ত সন্ধান,
আরক্ত আভা তোমার তৃতীর কণ্ঠ রবে না ঢাকা,
আবার মেলবে রক্তিম আঙুরাখা
নীল আকাশের তারার বনের স্বপ্নমুখর মনে
আখরোট বনে
বাদাম, খুবানি বনে ।

গৌধূলি-তরল সেই হরিণের তনিমা পাটল
—অস্ত্রির বিদ্যুৎ, তার বাঁকা শিঙে ভেসে এল চাঁদ,
সাত সাগরের বুকে সেই শুধু আলোক-চঞ্চল ;
অঙ্ককার ধনু হাতে তীর ছোড়ে রাত্রির নিষাদ ।
আরব সমুদ্র-স্রোতে ক্রমাগত দূরের আহ্বান,
তরুণীর মুখ থেকে মুছে গেছে দিনের রক্তমা,
এ দিকে হরিণ আনে বাঁকা শিঙে চাঁদ : রমজান ;
ক্ষীণাঙ্গীর প্রতীক্ষায় যৌবনের প্রাচুর্য : পূর্ণিমা ।

ষোল পাপড়িতে ঘেরা ষোড়শীর সে পূর্ণ যৌবনে
আসিল অতিথি এক বন্দরের শান্ত মুসাফির!
সূর্যাস্তের অগ্নিবর্ণ সেহেলির বিমুগ্ধ স্বপনে,
নিভৃত ইঙ্গিত তার ডেকে নেয় পুষ্পিত গহনে ;
অনেক সমুদ্র তীরে স্বপ্নময় হ'ল এ শিশির,
তারার সোনালি ফুল ছিটে পড়ে রাত্রির অঙ্গনে ।

ঝরো কা 'য়

মুসাফির জনতার মৃদুশব্দ নিলমুখ নীল পেয়ালায়
মিশে গেল আকাশের স্তব্ধ ঝরোকায়!
সূর্য্য পাহাড়ে লুপ্ত অগ্নিবর্ণ গুলরুখ শিখা ।

অন্ধ পরিত্রমা-শ্রান্ত সে তীব্র দাহিকা
স্মৃতি শুধু দূরে বনান্তের ।
শিরিষের
শাখা ছেড়ে আরো দূরে রজনীগন্ধার,
হেনার ;
কিন্ধা বাগদাদের
হাজার রাত্রির এক রাত এল নেমে!

হে প্রিয়া শাহেরজাদী! তুমি আজ কী অজ্ঞাত প্রেমে
জেগে ওঠো শঙ্কায়, লজ্জায় ?
তোমার সকল প্রেম আবার লুকাতে চায়
নেকাব-প্রচ্ছায় ?

বুখা বাজে রিনিঝিনি
হীরার জেওর!
হে ছলনাময়ী! অন্ধ পুরুষের, পৌরুষের কেড়ে নাও
শ্রান্ত ঘুমঘোর,
ছড়াও পরাগ রক্তাধরা
জাফরানের মধু-গন্ধ ভরা ।

রাত্রি আজ গাঢ় ঘন! মন
দক্ষিণ হাওয়ায় ভেসে মুসাফির উজানী-পবন,
গন্ধ খুঁজে ফেরে ।

আকাশেরে করিয়া চৌচির
তার কান্না লুটে পড়ে
উত্তর সাগর তীরে দক্ষিণের সামুদ্রিক ঝড়ে,
সন্ধান করে সে ইতস্তত
নীড় তার শ্রাবণের পাখীদের মত ।

গন্ধ আসে দূরান্তর হ'তে ।
হে প্রিয়! ভেসেছি আমি দীর্ঘ নওবাহারের ঘন নীল শ্রোতে,
তখন তোমার
ও-সুরভি ভার
স্পর্শ করি গেছে বারে বারে ;
প্রখর আতশী শ্রোতে ভেসে আমি চাইনি তোমারে ।

আজ আমি খুঁজে মরি
পাতায় পাতায়, ঘাসে ঘাসে,
পাই না তোমাকে । শুধু বহু দূর হ'তে গন্ধ আসে
ভেসে যায় মাঠ, মন মুহূর্তের রক্তিম প্রস্থাসে ।
তারপর ক্ষণদীপ্ত সে প্রান্তরপারে
পাই না তোমারে ।

আজ তার গন্ধ আসে, রাত্রির নিশ্বাসে তুষাতুর হৃদয় আমার
জানি যে তোমারো, তাই আগে বহু আগে বারবার
লায়লির ইশারায় বুকে পুরে তারুণ্যের লেলিহ আশুন
সবুজ দিগন্ত তার পাড়ী দিয়ে চ'লে গেছে কবে মজনুন
ধূসর জগতে ।
পরতে পরতে
এঁকে গেছে, রেখে গেছে তারা _
ওয়েসিস বুকে নিয়ে হেসেছে সাহারা ;

স্বপ্ন মরুভূর
হয়তো জ্বলন্ত তার ক্ষুদ্র বুকে দীউয়ানা সে সুর
চলিষ্ণু জীবন-শ্রোতে ভাসমান গতির প্রবাহ
মুছে নিয়ে গেছে তার আকাশের দাহ
দিয়ে গেছে প্রশান্তি নিঝুম
মরুভূর ঘুম...

তোমাকে সুন্দর করে সে আমার প্রেম
অন্তরের ঘ্রাণ,
দিন রাত্রি ঝ'রে ঝ'রে পড়ে
দীর্ঘ পদ্মনাল বেয়ে পাপড়ির পরে...
ভ'রে ওঠে মনের আকাশ দীর্ঘশ্বাস অপরাহ্ন বেলা
পাপড়ির দ্বার রুধি' পদ্মের সুরভি কোথা চ'লেছে একেলা,

পিছে ফেলে পরিত্যক্ত পাপড়ির বাস,
ভেসে চলে মন, দূরে ভেসে চলে সুরভি প্রশ্বাস,
জানি না কোথায়—

ব'সে আছি অন্ধকারে নিশীথ-প্রচ্ছায়,
পাপড়ি যায় না দেখা, আজ শান্ত ধমনীর আগেয় উৎসব।
শুধু একা করি অনুভব
তোমার হারানো গন্ধ সুরভি-প্রশ্বাস,
মনের অলিন্দে শুধু দেখা দেয় তন্দ্রাতুর তোমার আকাশ।

মুগ্ধ মন আকুল সৌরভে
নাহি জানি ভুলেছে সে কবে
রজনীগন্ধার স্নিগ্ধ তীরু বাতায়ন,
রুদ্ধ কারা দ্বার ভাঙি' আজ সে করিছে দূরে কার অন্বেষণ!
নৈশ বাতাসের তীরে
আঁধারের বুক চিরে
নেমে আসে ঘুম।

মনে হয় আকাশ কুসুম
তোমার সন্ধান।

তবু লাগে জোয়ারের টান,
সৃষ্টির অতলে যেয়ে হানা দেয় জাঘত চেতনা,
কী অসহ্য বেদনায় লাগে বুকে সৌরভ-মূর্ছনা!
বন-চামেলির স্রোতে ভেসে যাই কোথায় সুদূরে
ভারাক্রান্ত তনু ছেড়ে মন আজ ফেরে ঘুরে ঘুরে—
দক্ষিণ বাতাসে

নিজেকে হারিয়ে ফেলে ছুটে চলে ব্যাকুল আশ্বাসে।
প'ড়ে থাকে ধূলিমুঠি, প'ড়ে থাকে ভ্রান্ত অহংকার—
ব্যথাতুর হ'য়ে ওঠে সমগ্র চেতনা, সত্তা, মনের কিনার।
ধূলিতলে মিশে যায় রজনীগন্ধার—সুঠাম, সুগোল তনুতল,
ফোটায়ে বিগুত্র দল, ঝরায় সুরভি অনর্গল
আরগ্য হেনার ঝড়ে সৌরভ মর্মরে—

ভুলে যেয়ে আবর্তের টান,

অন্তরের য্রাণ,
পাপড়ির রূপ ছিঁড়ে খোঁজে সে গভীর মূলে সুরভি বিতান...

এখন

প্রশান্ত বাতাসে শুধু জাগিয়েছে গুলেনার বন,

থেমে গেছে যত কথা, গান,
তোমার হারানো স্মৃতি নিয়ে এল এ আকাশ-ভরানো তুফান ।

তোমাকে সুন্দর করে সে আমার প্রেম—
অন্তরের স্রাণ—

দিন রাত্রি ঝরে ঝরে পড়ে
পাপড়ির 'পরে,
মনের আকাশে
প্রশান্ত সৃষ্টির মত ব্যথাভারাক্রান্ত তার গন্ধ ভেসে আসে ।।

ডা হ ক

রাত্রিভ'র ডাহকের ডাক...

এখানে ঘুমের পাড়া, শুদ্ধদীঘি অতল সুপ্তির!
দীর্ঘ রাত্রি একা জেগে আছি।

ছলনার পাশা খেলা আজ প'ড়ে থাক,
ঘুমাক বিশ্রান্ত শাখে দিনের মৌমাছি,
কান পেতে শোনো আজ ডাহকের ডাক।

তারার বন্দর ছেড়ে চাঁদ চলে রাত্রির সাগরে
ক্রমাগত ভেসে ভেসে পালক মেঘের অন্তরালে,
অশ্রান্ত ডুবুরি যেন ক্রমাগত ডুব দিয়ে তোলে
স্বপ্নের প্রবাল।

অবিশ্রাম ঝ'রে ঝ'রে পড়ে
শিশির পাখার ঘুম,
গুলে বকৌলির নীল আকাশ মহল
হ'য়ে আসে নিসাড় নিঝুম,
নিভে যায় কামনা চেরাগ ;
অবিশ্রান্ত ওঠে শুধু ডাহকের ডাক।

কোন ডুবুরির
অশরীরী যেন কোন প্রচ্ছন্ন পাখীর
সামুদ্রিক অতলতা হ'তে মৃত্যু-সুগভীর ডাক উঠে আসে,
ঝিমায় তারার দীপ স্বপ্নাচ্ছন্ন আকাশে আকাশে।

তুমি কি এখনো জেগে আছো ?
তুমি কি শুনছো পেতে কান ?
তুমি কি শুনছো সেই নভঃগামী শব্দের উজান ?

ঘুমের নিবিড় বনে সেই শুধু সজাগ প্রহরী।
চেতনার পথ ধরি চলিয়াছে তার স্বপ্ন-পরী,
মস্তুর হাওয়ায়।
সাথী তন্দ্রাতুর।

রাত্রির পেয়ালা পুরে উপচিয়া প'ড়ে যায় ডাহকের সুর ।
শুধু সুর ভাসে
বেতস বনের ফাঁকে চাঁদ ক্ষ'য়ে আসে
রাত্রির বিষাদ ভরা স্বপ্নাঙ্ঘ্র সাতোয়া আকাশে ।

মনে হয় তুমি শুধু অশরীরী সুর!
তবু জানি তুমি সুর নও,
তুমি শুধু সুরযন্ত্র! তুমি শুধু বণ্ড
আকাশ-জমানো ঘন অরণ্যের অন্তর্লীন ব্যাথাভূর গভীর শিক্কুর
অপরূপ সুর...
অফুরান সুরা...

ম্লান হ'য়ে আসে নীল জোছনা বিধুরা
ডাহকের ডাকে!
হে পাখী! হে সুরাপাত্র! আজো আমি
চিনিনি তোমাকে ।

হয়তো তোমাকে চিনি, চিনি ঐ চিত্রিত তনুকা,
বিচিত্র তুলিতে আঁকা
বর্ণ সুকুমার ।
কিন্তু যে অপূর্ব সুরা কাঁদাইছে রাত্রির কিনার
যার ব্যথা-ভিক্ত রসে জ'মে ওঠে বনপ্রান্তে বেদনা দুঃসহ,
ঘনায় তমালে, তালে রাত্রির বিরহ
সেই সুর পারিনা চিনিতে ।

মনে হয় তুমি শুধু সেই সুরাবাহী
পাত্র ভরা সাকী ।
উজাড় করিছ একা সুরে ভরা শারাব-সুরাহি
বনপ্রান্তে নিভৃত একাকী ।

হে অচেনা শারাবের 'জাম'!
যে সুরার পিপাসায় উনুখ ; অধীর অবিশ্রাম
সূর্যের অজানা দেশে
তারার ইশারা নিয়ে চলিয়াছ এক মনে ভেসে
সুগভীর সুরের পাখাতে,
স্তব্ধ রাতে
বেতস প্রান্তর ঘিরে

তিমির সমুদ্র ছিঁড়ে

চাঁদের দুয়ারে,
যে সুরার তীব্র দাহে ভেসে চলো উত্তাল পাথারে,
প্রান্তরে তারার ঝড়ে
সেই সুরে ঝরে পড়ে
বিবর্ণ পালক,
নিমেষে রাঙায়ে যায় তোমার নিষ্প্রভ তনু বিদ্যুৎ ঝলক,
তীর-তীব্র গতি নিয়ে ছুটে যায় পাশ দিয়ে উষ্কার ইশারা,
মৃত অরণ্যের শিরে সমুদ্রের নীল ঝড় তুলে যায় সাড়া
উদ্গাম চঞ্চল ;
তবু অচপল
গভীর সিন্ধুর
সুদুর্গম মূল হ'তে তোলো তুমি রাত্রিভরা সুর ।

ডাহকের ডাক...

সকল বেদনা যেন, সব অভিযোগ যেন
হ'য়ে আসে নীরব নির্বাক ।

রাত্রির অরণ্যতটে হে অশ্রান্ত পাখী!
যাও ডাকি ডাকি
অবাধ মুক্তির মত ।

ভারানত
আমরা শিকলে,
শুনিয়া তোমার সুর, নিজেদেরি বিষাক্ত ছোবলে
তনুমন করি যে আহত ।

এই ম্লান কদর্যের দলে তুমি নও,
তুমি বও
তোমার শৃঙ্খল-মুক্ত পূর্ণ চিহ্নে জীবনমৃত্যুর
পরিপূর্ণ সুর ।

তাই তুমি মুক্তপক্ষ নিভৃত ডাহক,
পূর্ণ করি বুক
রিক্ত করি বুক
অমন ডাকিতে পারো । আমরা পারি না ।

বেতস লতার তারে থেকে থেকে বাজে আজ আবাসের বীণা ;
ক্রমে তা'র থেমে যায়,
প্রাচীন অরণ্যতীরে চাঁদ নেমে যায় ;
গাঢ়তর হ'ল অন্ধকার ।
মুখোমুখি ব'সে আছি সব বেদনার

ছায়াচ্ছন্ন গভীর প্রহরে ।
রাত্রি ঝ'রে পড়ে

পাতায় শিশিরে...
জীবনের তীরে তীরে...
মরণের তীরে তীরে...

বেদনা নির্বাক ।

সে নিবিড় আচ্ছন্ন তিমিরে
বুক চিরে, কোন্ ক্লাস্ত কণ্ঠ ঘিরে দূর বনে ওঠে শুধু
তৃষাদীর্ঘ ডাহকের ডাক ।।

এই সব রাত্রি

এই সব রাত্রি শুধু এক মনে কথা কহিবার
নিজেদের সাথে,
পুরানো যাত্রীর দল যারা আজি ধূলির অতিথি
দাঁড়ালো পশ্চাতে ।

কায়খসরুর স্বপ্ন কঙ্কালের ব্যর্থ পরিহাস
জীবাণুর তনু পুষ্টি করিয়াছে কবে তার লাশ!
শাহরিয়ার দেখে যায় কামনার নিষ্ফল ব্যর্থতা,
জিজ্ঞাসে আবদ্ধ এক জীবনের চরম রিক্ততা ।

এই সব রাত্রি শুধু একমনে কথা কহিবার—
খরশ্রোতা জীবনের কোল ঘেঁষে যেখানে অসাড়
অন্ধকার বালিয়াড়ি, তলদেশে যাত্রীরা নিশ্চল,
মৃত্যুর কুয়াশা মাঝে বিবর্ণ তুহিন তনুতল
আঘাতে সকল গান, সব কথা রিক্ত নিরুত্তাপ,
স'য়ে যায় কবরের, স'য়ে যায় ধূলির প্রতাপ,
এই সব রাত্রি শুধু একমনে সেই কথা শোনে,
সেতারা উড়িয়ে তার অন্ধকার দুরন্ত পবনে ।

এই সব আঁধারের পানপাত্র, মর্মর নেকাব
ছাড়ায়ে হীরার কুচী, জ্বলিতেছে জ্বলেখার খাব,
লায়লির রঙিন শারাব । কেনানের ঝরোকার ধারে ;
ঝরিয়ে রক্তিম চাঁদ আঁধারের বালিয়াড়ি পারে ।

এই সব রাত্রি শুধু একমনে ক'রে যায় ধ্যান,
আবার গুনিতে চায় কোহিতুর, সাফার আহবান
দূরচারী মুসাফির কাফেলার ঘন্টার ধ্বনিতে
তারার আলোয় গ'লে মারোয়াঁর পাহাড়তলীতে
মৃদু-স্বপ্নে কথা ক'য়ে আবছায়া শুভ্রতা বিতোর,
এই সব ম্লান রাত্রি সূর্যালোকে হ'তে চায় ভোর । ।

পুরানো মাজারে

পুরানো মাজারে শুয়ে মানুষের কয়খানা হাড়
শোনে এক রাতজাগা পাখীর আওয়াজ । নামে তার
ঘনীভূত রাত্রি আরো ঘন হ'য়ে স্মৃতির পাহাড় ।
এই সব রাত্রি শুধু একমনে কথা কহিবার
নিজেদের সাথে । জানি ;— মুসাফির—ধূলির অতিথি
প্রচুর বিভ্রমে, লাস্যে দেখেছিল যে তন্নী পৃথিবী
পুঞ্জীভূত স্মৃতি তার জীবনের ব্যর্থ শোক-গীতি ;
রাতজাগা পাখীর আওয়াজ : জমা আঁধারের টিবি—
যেন এক বালুচর, দুই পাশে তরঙ্গ-সঙ্কুল
জীবনের ঋনস্রোত, নিস্প্রাণ বিশুদ্ধ বালুচরে
কাফনের পাশ দিয়ে বেজে চলে দৃঢ় পাখোয়াজ ।
পুরানো ইঁটের কোলে শোনে কারা সংখ্যাহীন ডুল
ঝরেছে অপরায়েয় অগণিত মৃত্যুর গহবরে ।
মাজার কাঁপায়ে তোলে রাতজাগা পাখীর আওয়াজ । ।

পাঞ্জেরী

রাত পোহাবার কত দেৱী পাঞ্জেরী ?

এখনো তোমার আসমান ভরা মেঘে ?
সেতারা, হেলাল এখনো ওঠেনি জেগে ?
তুমি মাতুলে, আমি দাঁড় টানি ভুলে ;
অসীম কুয়াশা জাগে শূন্যতা ঘেরি ।

রাত পোহাবার কত দেৱী পাঞ্জেরী ?

দীঘল রাতের শ্রান্ত সফর শেষে
কোন দরিয়ার কালো দিগন্তে আমরা প'ড়েছি এসে ?
একী ঘন-সিয়া জিন্দগানীর বা'ব
তোলে মর্সিয়া ব্যথিত দিলের তুফান-শ্রান্ত ঋ'ব,
অ'ফুট হ'য়ে ক্রমে ডুবে যায় জীবনের জয়ভেরী ।
তুমি মাতুলে, আমি দাঁড় টানি ভুলে ;
সম্মুখে শুধু অসীম কুয়াশা হেরি ।

রাত পোহাবার কত দেৱী পাঞ্জেরী ?

বন্দরে ব'সে যাত্রীরা দিন গোণে,
বুঝি মৌসুমী হাওয়ায় মোদের জাহাজের ধনি শোনে ;
বুঝি কুয়াশায়, জোছনা-মায়ায় জাহাজের পাল দেখে ।
আহা পেরেশান মুসাফির দল
দরিয়া কিনারে জাগে তক্দিরে
নিরাশার ছবি ঐকে ।

পথহারা এই দরিয়া-সোঁতায় ঘুরে
চ'লেছি কোথায় ? কোন সীমাহীন দূরে ?
মুসাফির দল ব'সে আছে কূল ঘেরি ।
তুমি মাতুলে, আমি দাঁড় টানি ভুলে ;
একাকী রাতের মান জুলমাত হেরি ।

রাত পোহাবার কত দেৱী পাঞ্জেরী ?

শুধু গাফলতে, শুধু খেয়ালের ভুলে
দরিয়া-অথই ভ্রান্তি নিয়াছি তুলে,
আমাদেরি ভুলে পানির কিনারে মুসাফির দল বসি'
দেখেছে সভয়ে অন্ত গিয়াছে তাদের সেতারা, শশী ;
মোদের খেলায় ধূলায় লুটায় পড়ি'
কেঁদেছে তাদের দুর্ভাগ্যের বিশ্বাদ শব্দরী ।

সওদাগরের দল মাঝে মোরা ওঠায়েছি আহাজারী,
ঘরে ঘরে ওঠে ক্রন্দনধ্বনি আওয়াজ শুন্ছি তারি ।
ওকি বাতাসের হাহাকার,—ওকি

রোণাজারি ক্ষুধিতের !

ওকি দরিয়ার গর্জন,—ওকি বেদনা মজলুমের !
ওকি ক্ষুধাতুর পাঁজরায় বাজে মৃত্যুর জয়ভেরী !
পাজেরী !

জাগো বন্দরে কৈফিয়তের তীব্র ক্রকুটি হেরি ;
জাগো অগণন ক্ষুধিত মুখের নীরব ক্রকুটি হেরি ;
দেখ চেয়ে দেখ সূর্য ওঠার কত দেবী, কত দেবী ।।

স্বর্ণ - ঈগল

আল-বোরজের চূড়া পার হ'ল যে স্বর্ণ-ঈগল
গতি বিদ্যুৎ নিয়ে, উদ্দাম ঝড়ের পাখা মেলে,
ডানা-ডাঙা আজ সে ধূলায় যায় তারে পায় ঠেলে
কঠিন হেলার কোটা গর্বোদ্ধত পিশাচের দল ।

মাটিতে লুটানো আজ সেই স্বর্ণ পক্ষ, তনুতল!
আলো, বাতাসের সাথী, তুফানের সওয়ার নির্ভীক
অস্তিম লগ্নের ছায়া দেখে আজ সে মৃত্যু-যাত্ৰিক,
অতল কূপের তীরে পাষণ-সমাধি, জগদল ।

সূর্য আজ ডুব দিল অস্ত্রাসের তটরেখা পারে,
আসন্ন সন্ধ্যার কালি নিয়ে এল পুঞ্জীভূত শোক,
পাহাড় জুলের বোঝা রুদ্ধপথে দাঁড়ালো নির্মম ।

এখানে বহেনা হাওয়া এ বিস্তীর্ণ প্রান্তরের ধারে,
এই অজগর রাত্রি গ্রাসিয়াছে সকল আলোক,
সোহরাবের লাশ নিয়ে জেগে আছে নিঃসঙ্গ রক্তম ।

লা শ

(ভেরশো পঞ্চাশে)

যেখানে প্রশস্ত পথ ঘুরে গেল মোড়,
কালো পিচ-ঢালা রঙে লাগে নাই ধুলির আঁচড়,
সেখানে পথের পাশে মুখ গুঁজে প'ড়ে আছে জমিনের 'পর ;
সন্ধ্যার জনতা জানি কোনদিন রাখে না সে মৃতের খবর ।

জানি মানুষের লাশ মুখ গুঁজে প'ড়ে আছে ধরণীর 'পর,
ক্ষুধিত অসাড় তনু বত্রিশ নাড়ীর তাপে প'ড়ে আছে
নিসাড় নিখর,
পাশ দিয়ে চ'লে যায় সজ্জিত পিশাচ, নারী নর
—পাথরের ঘর,
মৃত্যু কারাগার,
সজ্জিত নিপুণা নটি বারঙ্গনা খুলিয়াছে দ্বার
মধুর ভাষণে,
পৃথিবী চমিছে কারা শোষণে, শাসনে
সাক্ষ্য তার রাজপথে জমিনের 'পর
সাড়ে তিন হাত হাড় রচিতেছে মানুষের অস্তিম কবর ।

প'ড়ে আছে মৃত মানবতা
তারি সাথে পথে মুখ গুঁজে ।
আকাশ অদৃশ্য হ'ল দাঙ্জিকের খিলানে, গম্বুজে
নিত্য স্ফীতোদর
এখানে মাটিতে এরা মুখ গুঁজে মরিতেছে ধরণীর 'পর!
এ পাশব আমানুষী ত্রুর
নির্লজ্জ দস্যুর
পৈশাচিক লোভ
করিছে বিলোপ
শাস্ত্বত মানব-সত্তা, মানুষের প্রাপ্য অধিকার,
ক্ষুধিত মুখের গ্রাস কেড়ে নেয় রুধিয়া দুয়ার,
মানুষের হাড় দিয়ে তারা আজ গড়ে খেলাঘর ;
সাক্ষ্য তার প'ড়ে আছে মুখ গুঁজে ধরণীর 'পর ।

স্ফীতোদর বর্বর সভ্যতা—
এ পাশবিকতা,

শতাব্দীর জ্বরতম এই অভিশাপ
বিষাইছে দিনের পৃথিবী ;
রাত্রির আকাশ ।

এ কোন্ সভ্যতা আজ মানুষের চরম সত্তাকে
করে পরিহাস ?
কোন্ ইবলিস আজ মানুষেরে ফেলি মৃত্যুপাকে
করে পরিহাস ?
কোন্ আজাজিল আজ লাখি মারে মানুষের শবে ?
ভিজায়ে কুৎসিত দেহ শোণিত আসবে
কোন্ প্রেত অট্টহাসি হাসে ?
মানুষের আর্তনাদ জেগে ওঠে আকাশে আকাশে!

কোন্ প্রবৃত্তির কাছে আজ ওরা পড়িয়াছে বাঁধা ?
গোলাবের পাপড়িতে ছুড়িতেছে আবর্জনা, কাদা
কোন্ শয়তান ?
বিষাক্ত কামনা দিয়ে কে ভরায় আকাশের রঙিন খিলান ?

কার হাতে হাত দিয়ে নারী চলে কাম সহচরী ?
কোন্ সভ্যতার ?
কার হাত অনায়াসে শিশু কণ্ঠে হেনে যায় ছুরি ?
কোন্ সভ্যতার ?
পাঁজরার হাড় কেটে নৃত্য সুর জেগে ওঠে কার ?
শ্রমিকের রক্তপাতে পান-পাত্র রেঙে ওঠে কার ?
কোন্ সভ্যতার ?

মানুষ তোমার হাতে করিয়াছে কবে আত্মদান,
তারি শোধ তুলে নাও হে জড়-সভ্যতা শয়তান!
শিশুর শোণিত হেসে অনায়াসে করিতেছ পান,
ধর্ষিতা নারীর দেহে অত্যাচার করিছ অমান,
জনতার সিঁড়ি বেয়ে উর্ধ্বে উঠি অতি অনায়াসে
তারে তুমি ফেলে যাও পথ-প্রান্তে নর্দমার পাশে ।

জড়পিণ্ড হে নিঃস্ব সভ্যতা!
তুমি কার দাস ?
অথবা তোমারি দাস কোন্ পশুদল!

মানুষের কী নিকৃষ্ট স্তর!

যার অত্যাচারে আজ প্রশান্তি ; মাটির ঘর : জীবন্ত কবর
মুখ গুঁজে প'ড়ে আছে ধরণীর 'পর ।

সুসজ্জিত-তনু যারা এই জড় সভ্যতার দাস,
যাদের পায়ের চাপে ডুকরিয়া কেঁদে ওঠে পৃথিবী, আকাশ,
তারা দেখে নাকো চেয়ে কী কলুষ দুর্গন্ধ পুরীষে
তাদের সমগ্র সত্তা পশুদের মাঝে চলে মিশে!

কুকুর, কুকুরী

কোন ব্যাভিচারে তারা পরস্পর হানিতেছে ছলনার ছুরি,
আনিছে জারজ কোন মৃত সভ্যতার পদতলে!
উরুর ইঙ্গিত দিয়ে তাদের নারীরা আজ মৃত্যু পথে চলে,
লোভের নিকট ক্ষুধা বুকে নিয়ে অত্যাচারী পুরুষেরা চলে,
মানুষের পথ ছেড়ে বহু নিম্নে মৃত্যুর অতলে ।

তাহাদেরি শোষণের ত্রাস

করিয়াছে গ্রাস

প্রশান্তির ঘর,

যেথা মুখ গুঁজে আছে শীর্ণ শব ধরণীর 'পর ।

হে জড় সভ্যতা!

মৃত-সভ্যতার দাস স্ফীতমেদ শোষণক সমাজ!

মানুষের অভিশাপ নিয়ে যাও আজ ;

তারপর আসিলে সময়

বিশ্বময়

তোমার শৃঙ্খলগত মাংসপিণ্ডে পদাঘাত হানি'

নিয়ে যাব জাহান্নাম দ্বার-প্রান্তে টানি';

আজ এই উৎপীড়িত মৃত্যু-দীর্ণ নিখিলের অভিশাপ বও:

ধ্বংস হও

তুমি ধ্বংস হও ।।

তু ফা ন

দুর্বার তরঙ্গ এক ব'য়ে গেল তীর-তীর বেগে,
বলে গেল : আমি আছি যে মুহূর্তে আমি গতিমান ;
যখনি হারাই গতি সে মুহূর্তে আমি আর নাই ।

—ইক্বাল

সে তুফান থেমে গেছে, সাইমুমের সে দুর্ধর্ষ পাখা—
সাহারার সূর্য-ঝড় লুপ্ত হিম-শব্দরী-অতলে,
অন্ধ, মূক আঁধারের অজগর হিংস্র ফণা তলে
দূরচারী বেদুইন-খর রশ্মি আজ মেঘে ঢাকা,
আজ মরু-বালুকাতে লুপ্ত তার বিজয়ী পতাকা,
সেই গতিহারা ঝঞ্ঝা ধূলি লীন অস্তিত্ববিহীন
দুর্ভিক্ষ মড়কে আজ গণিতেছে তার শেষ দিন,
ক্ষুধার কাফনে তার সর্বগ্রাসী মৃত্যু আঙুরাখা!
সে বিপুল প্রাণ-বহি তবু আজো মরে নাই জানি
হে বলিষ্ঠ! যদি তুমি নেমে এস এ-পথে বারেক,
এই মৃত মরুতটে যদি তুমি দাঁড়াও সন্ধানী,
মানুষের এ মিছিলে দিতে পারো যদি গতিবেগ,
অনায়াসে সেই ঝড় আবার তুলিবে তারা টানি',
মৃত মাঠে দিয়ে যাবে সাহারার উদ্দাম আবেগ ।।

হে নিশান - বাহী!

নিশান কি ঝড়ে প'ড়ে গেছে আজ মাটির পরে ?
আধো চাঁদ-আঁকা সেই শাস্বত জয়-নিশান ?
বহু মৃত্যুর প্রলয়-আঘাতে, প্রবল ঝড়ে
নুয়ে গেছে সেই প্রথম দিনের জয়-নিশান ?
হামাগুড়ি দিয়ে কারা চলে ঐ পতাকীদল ?
কার ক্রন্দনে ভরিছে শূন্য জলস্থল ?
নিশান কি আজ প'ড়ে গেছে ভুঁয়ে,
নিশান-বাহী কি চলে মাটি ছুঁয়ে,
শিয়রে কি তার কঠিন বাধার জগদ্দল ?
বুক চাপা দেওয়া ঘন মিথ্যার জগদ্দল ?

হে নিশান-বাহী! আজো সম্মুখে রাতের সীমা,
দৃষ্টি রোধে কি তিমিরাচলের ঘন ম্লানিমা ?
আজো সম্মুখে বন্ধুর পথ বালিয়াড়ির
সঙ্গী-বিহীন জনতা-মুখর সাগরতীর ?

ঐ দেখো স্রোতে অরূপ আলোতে সূর্যতরী
তীক্ষ্ণ আলোর তুফানে ছিড়িছে এ শর্বরী,
এই কালো রাত জমাট-তুহিন হিম-অতল,
ছিড়ে চ'লে যায় আলোর ছোঁয়ায় গলানো জল ।

পাওনি এখনো আলোর পরশ নবজীবন ?
মৃত শব হ'তে হয়নি কি আজো উজ্জীবন,
এখনো সূর্য ভাঙেনি কি এই রাতের সীমা,
এখনো তোমার পথ ছেয়ে আছে ঘনম্লানিমা ?
হে নিশান-বাহী! তাই আছো নুয়ে ?
তাই কি পতাকা আছে মাটি ছুঁয়ে ?
তবু এই চলা জানি উদয়ের পূর্বাভাস,
কালো কুয়াশার পর্দায় ঢাকা
তোমার সূর্য, আলো, আকাশ ।

*

পায়ের তলায় প্রবল অশ্বখুরে
মরুবালাকার স্কুলিঙ্গ উঠে নিমেষে মিলায় দূরে,

ওড়ে বাতাসের শিখার শিখরে মুক্তি লাল,
শ্বেত পতাকায় শান্তিচিহ্ন আল-হেলাল ।
সেই উদ্দাম রণতুরঙ্গ মানে না বাধা,
পলকে পলকে জ্বলে তার খুরে অগ্নিশিখা!
আলোর প্লাবনে কে নিশান-বাহী অগ্রগামী,
ঝড়ের দাপটে ভাঙে শতকের কুজ্জটিকা ?
আমাকে জাগাও তোমার পথের ধারে,
আমাকে জাগাও এ বিজন কান্তারে,
আমাকে জাগাও যেখানে সেনানী! মানে না বাঁধন রবি,
আমাকে জাগাও যেখানে দীপ্ত সে মদিনাতুল্লাহী,
বিশ্বকরণা, মুক্তি পদ্ম—বেদনা লাল
বহিছে চিত্ত-সুরভিত শ্বেত আল হেলাল ।।

*

আজ দেখি হেথা ভাঙে আর গড়ে শর্বরী বিশ্বাদ,
পাপড়ি খোলার মুহূর্তে জাগে মুমূর্ষু অবসাদ ।
কোথায় নিশান, কালের পাখায় মিলালো কোথা-সে-দিন,
সেই অভিযান-স্মৃতি নিয়ে আছে মরুভূমি ধূলিলীন,
জরাগ্রস্ত এ স্বাপদ ভূমির রজনী-স্বপ্নহীন,
প্রবল বাধার পাহারায় হেথা উদ্যত সংগীন ।।

হে নিশান-বাহী! অশ্বখুরের প্রবল ধ্বনি
যায় না শোনা,
আজ অগণন ক্ষুধিত মুখের আর্তধ্বনি
যায় না গণা ।
কোথায় তোমার বীর-সঙ্গীর উদ্বোধন ?
ফিরে আসে আজ নিরাশ হাওয়ায় শূন্যমন ।
মাটি ছেঁওয়া হয় তোমার নিশান ওড়েনা ঝড়ে ;
তোমার সাথীরা পথে প্রান্তরে জরায় মরে ।

হে নিশান বাহী! ওড়াও তবুও আধেক চাঁদ,
ভাঙে বারবার রাত্রির দ্বার মৃত্যুবাঁধ
হয়তো এখানে জাগিবে না আজ শত্রুধ্বনি,
ভাঙা শিরদাঁড়া হবে শঙ্কিত মৃত্যু গণি ;
হে নিশান-বাহী! ওড়াও তবুও ওড়াও
হেলাল রশ্মি আকাশে আকাশে ছড়াও ।

নিশান তোমার যদি না ওড়ে ;
নিশান তোমার প্রবল বাড়ে
যদি বা কখনো ধূলায় পড়ে,
তবুও দিনের স্বপ্নসাধ
এ ধূলি-ধূসর পথের পরে ।

জানি এই-দল ভাঙা মিছিল
বিজয়ী মুঠিতে নেবে নিখিল,
খুলি রাত্রির তিমির খিল
জাগাবে সূর্য ; জাগাবে নীল ।।

এখনো তোমার দৃষ্টিতে জাগে সুদূরের ইঙ্গিত-
সমুদ্রপথ আবিষ্কারের বিপুল সম্ভাবনা,
নিমেষে আকাশ পার হ'য়ে এসে বসুধার সঙ্গীত
শুনিবার সাধ এখনো তোমার যায়নি অন্যমনা!
তুমি বেঁচে আছো, আজো বেঁচে আছো—সেনানীর তরবারী ;
আধো চাঁদ আজো সঙ্গী তোমার হে আল-হেলালধারী!
তোমার তনুর অণুতে অণুতে সেই অশ্রুত সুর,
জাগ্রত মানবাত্মা হেরিছে সমুদ্র অশ্রুর ।
আছে তার পার, সাগর-বেলার তীরে ভয় পেয়োনা কো,
আধো চাঁদ আঁকা হে নিশানধারী, এ মিনতি মোর রাখো—
যেথা সমুদ্র হিঙ্গ্র ক্ষুধায় আঁধার-নীল
যেথা আবর্ত-সঙ্কুল স্রোত বাধা কুটিল ।।

নি শা ন

আধো চাঁদ আঁকা নিশান আমার! নিশান আমার!
তুমি একদিন এনেছিলে বান—জীবন তুফান!
জুলফিকারের, খালেদী বাজুর তুমি সওয়ার,
উমরের পথে বিশ্বের দ্বারে হে অম্লান,
পার হয়ে গেছ বিয়াবান আর খাড়া পাহাড়
সবল হাতের কব্জায় যবে ছিলে সওয়ার।

কমজোর বাজু পারে না বইতে ও গুরুভার,
সঙ্গ দিলে আজ ওড়ে না নিশান মানবতার ;
চারদিকে আজ দেখছে সে তাই মৃত্যু তার!

কার হাতে তুমি সওয়ার হ'য়েছ আল হেলাল ?
আরাফাত মাঠ প'ড়ে আছে ম্লান নাই বেলাল!
তাই বিমর্ষ আকাশ-কিনার, দিনের মিনার ;
পারি না ওড়াতে সেখানে নিশান—নিশান আমার!
অথবা পঙ্গু দুর্বল আজ ঈমান তাই
পরাজিতের এ দুয়ারে জেহাদী নিশান নাই,
আজ প'ড়ে আছি খেলার পুতুল আজাজিলের,
মুমিনের দিল হারায় আমরা মৃত দিলের
বোঝা ব'য়ে যাই ফরমান মেনে প্রবৃত্তির
তাই ক্রমাগত দূরে স'রে যায় দিনের তীর...
অন্ধ বধির মৃত্যুর নীড়, আসে শিকল,
শাসনে, শোষণে সাঁরা তনুমন জরা-বিকল।
আজকে তোমাকে ডাক দিই তাই হে অচপল!
হে জুলমাতের সফেদ মুক্তি, চির অটল!
তুমি ফিরে এসো আমাদের হাতে। শুভ্র উষার
সাফা মারোয়ার তাজা প্রাণ নিয়ে পথিক হেরার
জ্বালায়ে যাও এ মৃত জনপদ সিপাহসালার,
ভেঙে ফেলো এই জগন্দলের মৃত্যু দুয়ার।

হে নিশান ফের ইঙ্গিত দাও মানবতার,
হে নিশান ফের ইঙ্গিত দাও
মৃত যাত্রীকে পথ চলার,

ইঙ্গিত দাও মানবতার সে
পূর্ণ চাঁদের ভরা-বিকাশ!
মানবতাহীন মানুষের বুকে
যেখানে উঠছে নাভিস্বাস,
বধিগত তনু মনের আকাশ,
খাক হ'য়ে যেথা জ্বলে আকাশ,
চৈত্র-দক্ষ পোড়া মাটি ম্লান
নিষ্প্রভ নীল শূন্যাকাশ,
সেখানে জাগাও সাড়া সু-প্রবল
দাও আহ্বান পথ চলার ;
সেখানে তোমার ইশারা জানাও মানবতার ।

তায়ের পথে শোণিত ম্লানের আমন্ত্রণ,
জেরুজালেমের দুস্তর মাঠ
পাড়ী দিতে করো পরাণ পণ!
নিশান আমার! নিশান আমার!
একী নির্দেশ সীমা-বিলোপ ।
সবুজের বন, কেতকীর বন
সে কি শুধু হবে মনসা-ঝোপ!
সেখানে কি তুমি জাগবে না আর নিশান আমার ?
সেখানে কি তুমি জেগেছ আবার নিশান আমার ?
আউষ ধানের দেশে মদিনার রক্ত গোলাব
সকল আশার পূর্ণতা নিয়ে মেলবে কলাপ,
বন্য ঝড়ের বৈশাখী পাখা নিশান আমার
আধো চাঁদ আকা, হয় মেঘ ঢাকা নিশান আমার!

পথে প্রান্তরে লুপ্তিত আজ যার জীবন,
যে মৃতদলের সম্মুখে ব্যূহ রচে মরণ
তাদের আকাশে জাগালে আজ এ কিসের পণ :
বাঁচাতে হবে এ ধূলি-লুপ্তিত গণ-জীবন!
এই অতুলন জীবন বাঁচাতে হবে,
পায়রার খোপ ছেড়ে কবুতর ভাসবে আবার নভে,
অনেক দিনের জরা-বিশীর্ণ পায়রা সে
মুক্তা হাওয়ার আনন্দ হায় পায়না সে,
তারে দিতে হবে নতুন হাওয়ার
আনন্দ আর নব চেতন,

পায়রার খোপে মহা-বিস্তৃতি
সিন্ধু তীরের উজ্জীবন ।

বিরাট আকাশ ভরানো দিল!
উমরের সেই মহান দারাজ
দিগন্ত পারে ছড়ানো দিল!
নিশান আমার কি স্বপ্ন তুমি দেখছো আজ ;
নিশান আমার শীর্ণ মুঠিতে
পেতে চাও তুমি মহা-নিখিল ?
ক্ষুধিত মাটিতে সে নয় তাজমহল,
মানুষের মাঠে বিরান মাটিতে
এবার ফলাবে তাজা ফসল,
এবার নিশান খামবে না তুমি
গ'ড়তে শিলার তাজমহল,
এবার তোমার যাত্রা যেখানে
ক্ষুধা বিশীর্ণ অশ্রুজল,
এবার তোমার যাত্রা সে-পথে
যেথা উমরের পায়ের ছাপ
জং ধ'রে যেথা প'ড়ে আছে হায়
আলির হাতের জুলফিকার,
পিঠে বোঝা নিয়ে ক্ষুধিতের দ্বারে
চলে একটানা পথ তোমার ;
দেখো সিরাজাম-মুনিরা জ্ব'লছে
মুছে দিতে সব ফাঁকা প্রলাপ...

গুঁড়ো ক'রে দিতে কুয়াশার ভিতে
ম্লান জড়তার স্থবির গতি,
নাস্তিকতার টুটী ছিঁড়ে নিতে :
সায়ফুল্লার ঠিকরে জ্যোতি !
যেথা কবন্ধ মৃত জড়বাদ ;
সেখানে জীবন চিরন্তন ।
নিশান আমার ক'রবে কি ফের
সফেদ নূরের বীজ বপন ?

নিশান আমার! নিশান আমার!
এতদিনে হ'ল সময় তবে ?

আজ কি অন্ধ নফসের সব
জিন্দানখানা ভাঙতে হবে ?
পিছু ঠেলা দিয়ে জড় রোগীদের
দেবে কি আবার বিপুল গতি ;
আল-বোর্জের অচল শিখরে
বহাবে কি প্রাণ স্রোতস্বতী!

নিশান আমার! একদিন তুমি হে দূত উষার
খালেদের হাতে, তারেকের হাতে, হ'য়েছ সওয়ার,
উমর আলির হাতের নিশান নবীজীর দান ;
আমাদের কাছে নিশান তোমার শিখা হ'ল ম্লান ।
তুমি আনো ফের হেজাজ মাঠের মরু সাইমুম
ভাঙো আঁধারের শিখর, ওড়াও জড়তার ঘুম,
তুমি আনো সাথে মানবতার সে নির্ভীক বাড়
প্রলয়াকাশের বুকে জীবনের দাও স্বাক্ষর,
আউষ ধানের দেশে মদিনার সৌরভ ভার
ঝড় বৈশাখে জাগো নির্ভীক, জাগো নিশঙ্ক হেলাল আবার!
হও প্রতিষ্ঠ আকাশে আকাশে নিশান আমার
নিশান আমার ।।

নিশান - বরদার

দিন রাত্রির বোঝা হ'ল আজ দুঃসহ গুরুভার,
স্থলিত পথীর আয়োজন চলে পচাত্তর যাত্রার,
চারদিকে বন মরণ শর্তে জীবনের অধিকার—
এখানে তোমার নিশান ওড়াও হে নিশান বরদার!

ঘন হ'য়ে এল দুঃখের রাত তিমির নিবিড়তর
এবার তোমার আলোর নিশান এ-পথে প্রকাশ করো,
সূর্যের ঝড়ে এই আঁধারের মরাপাতা ফেলো ছিঁড়ে
মৃত্যুর তীরে তীরে
ওড়াও তোমার প্রথম উষার দীপ্ত বহি শিখা
আলোর তুফানে ভাসাও জীর্ণ শেহেলা কুঙ্কটিকা।

তোমার নিশান উড়ছে কোথায় নির্জন প্রান্তরে,
জনারণ্যের এখানে শূন্য শাখা,
নীড় ছেড়ে তার স্বপ্নের পাখী বহুদিন পলাতকা
জরাস্ববির তার সুদূরের পাখা
মাটিতে গুমরি মরে—
ভেঙে পড়ে বার বার
হে নিশান বরদার!

ইব্রাহিমের পথ বেয়ে যার শুরু হ'ল যাত্রার,
কমলিওয়ালার ডেরায় যে পেল ঠাঁই
সেই কাহফিল-ওয়ারার নিশান শারাবন তহরার
কাফুর সুবাস ব'য়ে নিয়ে আসে পার হ'য়ে কাস্তার ;
তুমি আনো সেই আলোর ইশারা ভাঙো এ তিমির দ্বার
মৃত্যুরণ্যের এ মনে আবার তুমি তার করো ঠাঁই।

মুক্ত কা'বার ভেঙেছে 'লাত' 'মানাত'
কালের কোঠায় তবু বদলিয়ে হাত
মনে মনে বাসা বেঁধেছে লাত মানাত
মেরু মজ্জায় আদ সামুদ্রে জড়তার কালোরাত!
কোথায় আলোর দূত ?
মাথা চাড়া দিয়ে কাঁটা বনে জাগে নতুন আদ সমুদ।

চারদিকে কারা ফেলে বিষাক্ত শ্বাস,
কারা ব'য়ে আনে করোটিতে মৃতাসব,
শবের মিছিলে ভিড় ক'রে আসে শব ;
মুখে বয়ে আনে চরম সর্বনাশ ।

সে পাশবতার আজ উদ্যত ফণা
বিষাক্ত করে সুদূর সম্ভাবনা,
ভেঙে পড়ে তার পুচ্ছ আঘাতে স্বপ্নের চারাগাছ,
লাত মানাতের সঙ্গে নাচে পিশাচ
আধো জীবন্ত তনু ;
রং চটা তার আকাশে কখন নিভেছে বর্ণ ধনু ।

সে সিদরাতুল-মুন্তাহার
পথ ভোলা বুলবুলি,
প্রতি মুহূর্তে আবিল করে সে
এই ধরণীর ধূলি,
ম্মান জ্বলমাতে আজ সে বিবর গড়ি'
দীপ্ত দিনে ক'রেছে কখন বিস্বাদ শবরী ।
তার কণ্ঠের বীভৎস চীৎকারে—
কেঁপে ওঠে বারে বারে
উষর মাটির বক্ষে অনুর্বর
দুঃস্বপ্নের ঘর ।

শঙ্কিত তার দিনের আকাশ,
বিভীষিকা ভরা ঘুম,
ছিন্ন ডেরার দুয়ারে আঘাত
হানে মরু সাইমুম,
তার কলিজার রক্তে রঙিন গ'ড়ে ওঠে ইমারত,
তার কঙ্কাল বিছায়ে জালিম মাপে মিনারের পথ ;
পথে পথে আজ শোন তার হাহাকার
হে নিশান বরদার!

এখানে তোমার নিশান ওড়াও, নিশান ওড়াও বীর,
এখানে শুধুই আবছায়া রাত্রির
তিমির নিবিড়তর,

এখানে তোমার সূর্য প্রকাশ করে ।
জনারণ্যের শাখায় শাখায় জাগে প্রাণ-ব্যাকুলতা
আনো আনো তার বিপুল তৃষার দুকূলে উচ্ছলতা
সমুদ্র স্রোতোধার ;
হে নিশান বরদার ।।

অনেক ঝড়ের দোলা পার হ'য়ে এল সে নাবিক!
অনেক ক্ষুধিত রাত্রি, আর বহু সামুদ্রিক পীড়া
চঞ্চল করেছে তারে, অন্ধকারে হারিয়েছে দিক,
কালো-পানি ঘিরে ঘিরে ডাকিয়াছে মৃত্যুর দৃতীরা,
ভেঙে-পড়া জাহাজের স্বৈদসিক্ত চরম নিরাশা,
সম্মুখে ডেকেছে তারে হিংস্র-নীল তিমির পাথার ;
অচেনা জগতে তবু সে নাবিক খুঁজে পেল বাসা ।

যদিও দু'চোখ তার দুঃস্বপ্নের কালো ভয়ে ভরা
যদিও বিবর্ণ গুঁথে লেগে আছে মৃত্যুর আশ্বাদ,
তবু জীর্ণ জাহাজের ভাঙা খোল আজ জয়ে ভরা
পশ্চাতে জাগিছে শুধু সে দুঃসহ স্মৃতির নিষাদ,
বহু ঝড় পার হয়ে এনেছে সে সম্পূর্ণ পশরা,
মানুষের আউলাদ ফিরেছে বিজয়ী সিন্দবাদ ।

*

দুর্গম সমুদ্র পারে আরেক অচেনা লোকে
দেখিছে সে মানুষের ঘর
জীবন্ত কবর,
যেথা বাসা বেঁধে আছে দাঙ্কিকের মৃত মরু মন
পাথর জমানো গ্রহসন ।

সারে সারে
কাতারে কাতারে
চলে ভারবাহী দল,
গাঁইতি, শাবল নিয়ে
কলম, লাঙল নিয়ে,
শ্রান্ত পদতল
চলে যাত্রীদল,
চলে ক্ষুধাতুর শিশু শীর্ণদাঁড়া, আর
চলিতেছে অসংখ্য কাতার
পার হ'য়ে মরু, মাঠ, বন ।
মানুষের আদালত ঘরে
পাথর-জমানো গ্রহসন ।

চলে দল বেঁধে শিশু ওষ্ঠে তুলি জীবনের
পানপাত্র সুতীব্র বিশ্বাদ
মানুষের বুড়ক্ষু মুমূর্ষু আউলাদ!

জড়তার—

পাথর জমানো পথ,
এ বীভৎস সভ্যতার
গড়খাই কাটা পথ
আঁধারে ঢাকিয়া আকাশেরে
ডাকে তাহাদেরে ।।

এ কোন্ পরিখা ?

এখানে জ্বলিছে শুধু ক্ষুধাতুর দিবসের শিখা
বিষাক্ত ধোঁয়ার কুঞ্জাটিকা
মৃত্যুর বিকট বিভীষিকা ।

মজ্জলুম মনের বোঝা, তারাক্রান্ত বেদনা অগাধ,
তারি মাঝে লাগি খেয়ে চলে আজ আদমের মৃত আউলাদ,
শয়তানের ডরে ;
বীভৎস কবরে ;
জটিল গহ্বরে ।

দল বেঁধে চলিছে শিশুরা মড়কের পথে,
কুৎসিত কুটিল কালো অন্ধকার শড়কে বিপথে
যেখানে প্রত্যেক প্রান্তে আজাজিল পাতিয়াছে ফাঁদ
তারি পানে, দুর্নিবার টানে চলে আজ মানুষের
দুর্বল, বিশীর্ণ আউলাদ ।

আমি দেখি পথের দু'ধারে ক্ষুধিত শিশুর শব,
আমি দেখি পাশে পাশে উপচিয়া পড়ে যায়
ধনিকের গর্বিত আসব,
আমি দেখি কৃষ্ণাণের দুয়ারে দুর্ভিক্ষ বিভীষিকা,
আমি দেখি লাঞ্ছিতের ললাটে জ্বলিছে শুধু অপমান টিকা,
গর্বিতের পরিহাসে মানুষ হ'য়েছে দাস,
নারী হ'ল নুষ্ঠিতা গণিকা ।

অনেক মঞ্জিল দূরে প'ড়ে আছে মানুষের ঘাঁটি,
এখানে শ্রেতের বহির্বাটি
এখানে আবর্তে পথহারা
চলিতেছে যারা
তাদের দিয়েছে ডাক জড়তার ত্রুর আজদাহা,
শতকের সভ্যতায় এরা আজ হ'ল তাই অক্ষ, গুমরাহা ।

বাড়িয়ে ত্রস্তের দল, বাড়াবে ত্রস্তের দল,
নর-ঘাতকের সাথে, নারী-ঘাতকের হাতে
হ'ল এরা শোণিত-চঞ্চল,
হ'ল এরা জালিম, নিষাদ,
মানুষের অমানুষ মৃত আউলাদ ।

পায় পায় বাধা দেয় শৃঙ্খল-বন্ধন,
থেকে যায় জীবন-স্পন্দন,
মানুষের আদালতে
পাথর-জমানো প্রহসন ।

এবার
ক্লীবের প্রতীক এই মানুষের আদালতে নয়,
শয়তানের কাদা মাখা কালো পথে নয়—
এবার আল্লার আদালতে
আমাদের ফরিয়াদ,
ক্ষুধিত লুণ্ঠিত এই মানুষের রিক্ত ফরিয়াদ ।

অনেক সভ্যতা জানি মিশেছে ধুলির নীচে, অনেক সমুদ
কত ফেরাউন, কত জালিম পিশাচ নমরুদ
মিশে গেল ধূলিতলে
নতুন যাত্রীর দল দেখা দিল দুর্গম উপলে
উড়িয়ে নিশান
সাথে ক'রে নিয়ে এল জীবনের অ-শান্ত তুফান ।

শুনি আজ তাদেরি দামামা
বাতাসে বাতাসে ওড়ে তাহাদের বিজয়ী আমামা
শুনি শুধু তাহাদেরি স্বর
বলিষ্ঠ বক্ষের তলে সুকোমল অন্তরের স্বর...

আর যেন ক্লিষ্ট নাহি হয়,
পথে দেখি-পীড়নের ফাঁদ,
আর যেন ভ্রষ্ট নাহি হয়
মানুষের ভবিষ্য দিনের আউলাদ ।।

সাত সাগরের মাঝি

কত যে আঁধার পর্দা পারায়ে ভোর হ'ল জানিনা তা' ।
নারঙ্গী বনে কাঁপছে সবুজ পাতা ।

দুয়ারে তোমার সাত-সাগরের জোয়ার এনেছে ফেনা ।
তবু জাগলে না ? তবু তুমি জাগলে না ?
সাত-সাগরের মাঝি চেয়ে দেখো দুয়ারে ডাকে জাহাজ,
অচল ছবি সে তসবির যেন দাঁড়ায়ে রয়েছে আজ ।
হালে পানি নাই, পাল তার ওড়ে নাকো,
হে নাবিক! তুমি মিনতি আমার রাখো :
তুমি উঠে এসো, তুমি উঠে এসো মাঝিমাল্লার দলে
দেখবে তোমার কিশ্তী আবার ভেসেছে সাগরজলে,
নীল দরিয়ায় যেন সে পূর্ণ চাঁদ,
মেঘ-তরঙ্গ কেটে কেটে চলে ভেঙে চলে সব বাঁধ ।
তবে তুমি জাগো, কখন সকালে ঝরেছে হাস্নাহেনা
এখনো তোমার ঘুম ভাঙলো না ? তবু তুমি জাগলে না ?

দুয়ারে সাপের গর্জন শোন নাকি ?
কত অসংখ্য ক্ষুধিতের সেথা ভিড়,
হে মাঝি! তোমার বেসাতি ছড়াও, শোনো ;
নইলে যে সব ভেঙে হবে চৌচির ।

তুমি দেখছেনো, এরা চলে কোন্ আলোয়ার পিছে পিছে
চলে ক্রমাগত পথ ছেড়ে আরো নীচে ।
হে মাঝি! তোমার সেতারা নেভেনি এ-কথা জানো তো তুমি,
তোমার চাঁদনি রাতের স্বপ্ন দেখছে এ মরুভূমি,
দেখ জমা হ'ল লালা, রায়হান তোমার দিগন্তরে ;
তবু কেন তুমি ভয় পাও, কেন কাঁপো অজ্ঞাত ডরে ।

তোমার জাহাজ হয়েছে কি বানচাল ?
মেঘ কি তোমার সেতারা করে আড়াল ?
তাই কি অচল জাহাজের ভাঙা হাল,
তাই কি কাঁপছে সমুদ্রে ক্ষুধাতুর
বাতাসে ফাঁপানো তোমার ও ফাঁকা পাল ?

জানি না, তবুও ডাকছি তোমাকে সাত দরিয়ার মাঝি,
প্রবাল দ্বীপের নারিকেল শাখা বাতাসে উঠেছে বাজি ।
এ ঘুমে তোমার মাঝি-মাল্লার ধৈর্য নাইকো আর,
সাত সমুদ্র নীল আক্রোশে তোলে বিষ ফেনভার,
এদিকে অচেনা যাত্রী চলেছে আকাশের পথ ধরে
নারঙ্গী বনে কাঁপছে সবুজ পাতা ।
বেসাতী তোমার পূর্ণ করে কে মারজানে মর্মরে ?
ঘুম ঘোরে তুমি শুনছো কেবল দুঃস্বপ্নের গাথা ।

উচ্ছ্বল রাত্রির আজো মেটেনি কি সব দেনা ?
সকাল হ'য়েছে । তবু জাগলে না ?

তবু তুমি জাগলে না ?

তুমি কি ভুলেছ' লবঙ্গ ফুল, এলাচের মৌসুমী,
যেখানে ধূলিতে, কাঁকরে দিনের জাফরাণ খোলে কলি,
যেখানে মুগ্ধ ইয়াসমিনের শুভ্র ললাট চুমি
পরীর দেশের স্বপ্ন-সেহেলি জাগে গুলে বকাওলী!

ভুলেছ' কি সেই প্রথম সফর জাহাজ চ'লেছে ভেসে
অজানা ফুলের দেশে,
ভুলেছ' কি সেই জামরুদ-তোলা স্বপ্ন সবার চোখে
ঝলসে চন্দ্রালোকে,
পাল তুলে কোথা জাহাজ চ'লেছে কেটে কেটে নোনা পানি,
অ-শ্রান্ত সন্ধানী
দিগন্ত নীল পর্দা ফেলে সে ছিঁড়ে
সাত-সাগরের নোনা পানি চিরে চিরে ।

কোন অজ্ঞাত বন্দরে এসে লাগলো সেই জাহাজ
মনে পড়ে নাকো আজ,
তবুও সেখানে ভ'রেছে জাহাজ মারজানে মর্মরে
এইটুকু মনে পড়ে ।

কবে যে তোমার পাল ফেটে গেছে উচ্ছ্বল ঝড়ে,
তোমার স্বপ্নের আজ অজগর দুঃস্বপ্নেরা ফেরে!
তারা ফণা তোলে জীর্ণ তোমার মৃত্যুর বন্দরে
তারা বিষাক্ত ক'রেছে তোমার নুয়ে পড়া আকাশেরে ।

তবু শূন্যে কি, তবু শূন্যে কি সাত-সাগরের মাঝি
শুকনো বাতাসে তোমার রুদ্ধ কপাট উঠেছে বাজি ;
এ নয় জোছনা—নারিকেল শাখে স্বপ্নের মর্মর,
এ নয় পরীর দেশের ঝরোকা নারঙ্গী বন্দর
এবার তোমার রুদ্ধ কপাটে মানুষের হাহাকার,
ক্ষুধিত শিশুর কান্নায় শেষ সেতারের ঝংকার ।

আজকে তোমার পাল ওঠাতেই হবে,
ছেঁড়া পালে আজ ছুড়তেই হবে তালি,
ভাঙা মাস্তুল দেখে দিক করতালি,
তবুও জাহাজ আজ ছোটাতেই হবে ।

কে জানে কখন কেটেছে তোমার স্বপ্নমুগ্ধ রাত,
আজকে কঠিন ঝড়ের বাতাস দ্বারে করে কশাঘাত,
সর্প-চিকন জিহ্বায় তার মৃত্যুর ইঙ্গিত,
প্রবল পুচ্ছ আঘাতে তোমার রঙীন মিনার ভাঙে ।
হে মাঝি! তবুও থেমো না দেখে এ মৃত্যুর ইঙ্গিত,
তবুও জাহাজ ভাসাতে হবে এ শতাব্দী মরা গাঙে ।

এখানে এখন রাত্রি এসেছে নেমে,
তবু দেখা যায় দূরে বহুদূরে হেরার রাজ-তোরণ,
এখানে এখন প্রবল ক্ষুধায় মানুষ উঠেছে কেঁপে,
এখানে এখন অজস্র ধারা উঠেছে দু'চোখ ছেপে
তবু দেখা যায় দূরে বহুদূরে হেরার রাজ-তোরণ...

কাঁকর বিছানো পথ,
কত বাধা, কত সমুদ্র, পবর্ত,
মধ্যদিনের পিশাচের হামাগুড়ি,
শুকনি ফেলেছে ছায়া আমাদের মাথার উপরে উড়ি',
ফেলেছি হারিয়ে তৃণঘন বন, যত পুষ্পিত বন,
তবু দেখা যায় দূরে বহুদূরে হেরার রাজ-তোরণ...
শাহী দরজার সকল কপাট অনেক আগেই খোলা,
অনেক আগেই সেখানে দ্বাদশী জোছনা দিয়েছে দোলা ।

হে মাঝি! তোমার নোঙ্গর তুলবে না ?
এখনো কি আছে দেবী ?

হে মাঝি! তোমার পাল আজ খুলবে না ?
এখনো কি তার দেরী ?

বাতাসে কাঁপছে তোমার সকল পাল
এবার কোরোনা দেরী,
নোনা পানি যদি ছুঁয়েছে তোমার হাল
তাহ'লে কোরোনা দেরী,
এবার তাহ'লে বাজাও তোমার যাত্রার জয়ভেরী,
আসুক যাত্রী পথিক, হে মাঝি এবার কোরোনা দেরী !

দেরী হ'য়ে গেছে অনেক জানো তা তুমি,
ফিরে গেছে কত জাহাজ-ভাসানো দরিয়ার মৌসুমী,
কত এলাচের দানা উড়ে গেছে ঝড়ে
দারুচিনি-শাখা ভেঙেছে বনাস্তরে,
মেশ্কেবর বাস বাতাস নিয়েছে লুটি'
মৃত্যু এখন ধ'রেছে তোমার টুটি,
দুয়ারে জোয়ার ফেনা ;
আগে বহু আগে ঝ'রেছে তোমার সকল হাসনাহেনা ।

সকল খোশবু ঝরে গেছে বুস্তানে,
নারঙ্গী বনে যদিও সবুজ পাতা—
তবু তার দিন শেষ হ'য়ে আসে ক্রমে—
অজানা মাটির অতল গভীর টানে
সবুজ স্বপ্ন ধূসতা ব'য়ে আনে
এ কথা সে জানে
এ কথা সে জানে ।

তবু সে জাগাবে সব সঞ্চয়ে নারঙ্গী রক্তিম,
যদিও বাতাসে ঝ'রেছে ধূসর পাতা ;
যদিও বাতাসে ঝ'রেছে মৃত্যু হিম,
এখনো যে তার জ্বলে অফুরান আশা ;
এখনো যে তার স্বপ্ন অপরিসীম ।

হে মাঝি! এবার তুমিও পেয়োনা ভয়,
তুমিও কুড়াও হেরার পথিক-তারকার বিন্দয়,

ঝরুক এ ঝড়ে নারঙ্গী পাতা, তবু পাতা অগণন
ভিড় করে—যেথা জাগছে আকাশে হেরার-রাজ-তোরণ ।

সে পথে যদিও পার হ'তে হবে মরু,
সে পথে যদিও দরিয়ার নোনা পানি,
তবুও সে পথে আছে মঞ্জিল, জানি আছে ছায়াতরু
পথে আছে মিঠে পানি ।

তবে পাল খোলো, তবে নোস্বর তোলো ;
এবার অনেক পথশেষে সঙ্কানী!
হেরার তোরণ মিলবে সমুখে জানি ।
তবে নোস্বর তোলো,
তবে তুমি পাল খোলো,
তবে তুমি পাল খোলো ।।

